

Saho Carta Que Dicjin Pablo Para Ixin Chojni Que Ditticaon Jesucristo Ngain Ciudad De Corinto

Pablo chjé joajna chojni Corinto

¹ Janha Pablo na, tti Dios vayahna janha para rrihi ná representanté Jesucristo. Janha co Sóstenes ² techjaha ra joajna ngain carta jíhi para ixin cain jaha ra que ditticaon ra Dios, xo te ra ngain ciudad de Corinto; jaha ra xo tequininxin ra ngain Dios ixin jaha ra anto ditticaon ra Jesucristo. Dios vayaha jaha ra ngain ná vida jian, jaha ra conixin cain chojni de cain lugar tti nichja na jian de ixin nombré Jesucristo, tti chonda joachaxin para ixin ján na. Jehe tti chonda joachaxin para ixin jehe na, co para ixin ján na cai. ³ Dios Ndodá na, co Jesucristo, tti chonda joachaxin para ixin ján na, sinchenchaon nganji ra co rrochjá ra tti chjoin que tsonohe ansean ra.

Quexén nchenchaon Dios chojni por ixin Jesucristo

⁴ Janha siempre chjaha gracias ngain Dios de ixin jaha ra ixin Dios jointtanchaon jaha ra de ixin Jesucristo. ⁵ Ixin ditticaon ra Cristo, Dios chjá jaha ra cainxin joachaxin de ngain cain tti jaha ra nichja ra co ngain cain tti jaha ra noha ra. ⁶ Tti ndattjo ra de ixin Cristo jaha ra ndoa vayehe ra. ⁷ Co jamé sinchetjanha ra ni ná cosa que danjo

Dios jaxon que xá techonhe jaha ra tti nchanho que Jesucristo, tti chonda joachaxin para ján na, rrocjan tsí iná. ⁸ Jehe tti sinchesoji ansean ra hasta are ndasenhe ra para que ni ná ra xonhi jianha sintteca ra are tsí Jesucristo, tti chonda joachaxin para ixin ján na. ⁹ Dios siempre nchehe tti jehe ndačho, co jehe tti vayaha jaha ra para que te ra jai, jaha ra conixin Jesucristo, Xenhe Dios co tti chonda joachaxin para ixin ján na.

Tti ndačho Pablo de ixin chojní Jesús que dačhjendehe chó

¹⁰ Nttatsanha ñao ra de ixin nombré Jesucristo, tti chonda joachaxin para ixin ján na, que dintte ra de acuerdo co dačhjendeha chó ra. Dintte ra nacoaxinxon grupo, co nacoaxinxon forma de xaxaon ra co de tsonohe ngain joarrixaoan ra. ¹¹ Janha ndačhjan jiji nganjí jaha ra ixin nindoha Cloé ndachjenji na na janha ixin jaha ra toñaohe chó ra. ¹² Janha ndačhjan que jaha ra toñaohe chó ra ixin cada jaha ra nichja ra ojejé; canxion ra ndačho ra: “Janha chojní Pablo na”; co icanxin ra ndačho ra: “Janha chojní Apolo na”; co icanxin ra ndačho ra: “Janha chojní Pedro na”; co icanxin ra ndačho ra: “Janha chojní Cristo na.” ¹³ Pero, ¿apoco Cristo rinao que chojní sačhjendehe chó na? ¿Apoco janha Pablo na goan na crucificado para ixin jaha ra? ¿O ani joiguitte jaha ra para sintte ra jeho chojnina? ¹⁴ Janha chjaha gracias ngain Dios ixin janha jointtaguitteha ni ná jaha ra, jeho Crispo co Gayo tti jointtaguitte janha. ¹⁵ Jañá ni ná chojni čhoha rrondačho na ixin joiguitte na

para sintte na chojnina janha. ¹⁶ Ján, cai jointtaguitte cain nindoha Estéfanas, pero janha ḫaxanho que ijointtaguitteha icha chojni. ¹⁷ Cristo coetonna para rrondattjan chojni queḥén sinchehe na para sayeha na castigo de ixin tti jianha que ncchehe na, pero janha nichjaha conixin joxon palabra ḫjoin inchin ncheḥoxinhi chojni, ixin janha nichja jeho de ixin quedonda Cristo ndavenxin nganito cruz, co jiji tti icha rentte para que chojni tsonohe.

Cristo chonda joachaxín Dios, co jehe chonxin quexehe cosa jian inchin Dios chonxin

¹⁸ Are chojni que ndaditján ngain vicio ttinihi na tti joajna de ixin quedonda ndavenxin Cristo nganito cruz, jehe na ḫaxaon na ixin mé ḫonhi ḫé, pero para jána que chonda na iná vida naroaxin que sehe para cainxin tiempo, joajna mé chonda joachaxín Dios. ¹⁹ Inchin ndačho ngain tti jitaxin Palabré Dios:

Janha tsjago ixin ḫonhi ḫé tti anto chonxin chojni
que anto nohe cosa de ngataha nontte,
co janha tsín ndaha joarrixaoen tti chojni que
chonda seguro ixin anto jian ttinxin de tti
nohe jeho.

²⁰ Mexinxin ḫonhi rentte tti ḫaxaon chojni que anto chonda seguro ngain tti jehe na ḫaxaon na, co tti anto nohe, co tti anto tjao chó de ixin cosa de ngataha nontte nttihi. Dios cjoago ixin tti ḫaxaon chojni que ditticaonha Jesucristo, mé ḫonhi ḫé. ²¹ Dios jehe nohe ncchehe cain cosa jian. Co jehe coančhjanda cain chojni que jeho ncheḥoxinhi na cosa de ngataha nontte para que rrochonxinha na

quehe rinao jehe Dios, ixin tti jehe na nohe na ḵonhi ḵé mé para ixin Dios. Pero jehe Dios conixin joajné coančhjandaha tsji ngain infierno tti chojni que chonda confianza ngain jehe Dios. Masqui tti chojni que ditticaonha ḵaxaon na que joajna jihī ḵonhi ḵé.

²² Ni chojni judío ni chojni griego rinaoha na sitticaon na tti jian joajné Jesucristo. Ixin chojni judío icha rinao na sicon na señal de milagro, co chojni griego icha rinao na ttjé na de queḥén tsonohe na queḥén rrochonxin na icha de ngataha nontte nttihi. ²³ Pero janha na ndattjan na cain chojni de ixin Cristo que goan crucificado. Co chojni judío are ttinihi na ixin Jesús goan crucificado, jehe na ḵaxaon na que mé ḵa jeha Cristo mero, mexinxin ḵa čohoa na ditticaon na. Co tti chojni que jeha judío, jehe na ndačho na ixin ḵonhi ḵé tti janha na ndačhjan na. ²⁴ Pero para tti chojni que Dios coinchiehe, masqui chojni judío o chojni griego, pero ttinxin na que Cristo chonda joachaxín Dios co jehe ttinxin cainxin tti nc̄hehe Dios. ²⁵ Ixin masqui jí chojni que ndačho ixin tti nc̄hehe Dios ḵonhi ḵé, pero jehe mé icha jian que cain tti jian que nc̄hehe chojni ngataha nontte. Co masqui jí chojni que ndačho ixin tti nc̄hehe Dios sojiha joachaxin chonda, pero jehe mé icha soji joachaxin chonda que tti joachaxin que chonda chojni ngataha nontte. ²⁶ Jaha ra chonda que rro᷇axaon ra queḥén vayaha ra Dios. Jehe vayaha ra masqui tsjeha ra chonxin ra jian tti nohe chojni ngataha nontte, co masqui tsjeha ra chonda ra joachaxin ngain icha chojni ni nindoi ra importanteha na ngain autoridad. ²⁷ Jeha jamé

ixin Dios coinchiehe de ngataha nontte tti chojni que icha xonhi chonxin para sinchecosoé na tti chojni que anto chonxin. Co Dios coinchiehe de ngataha nontte tti chojni que chondaha ni rioho joachaxin ngataha nontte para sinchecosoé na tti chojni que chonda anto tsje joachaxin. ²⁸ Dios coinchiehe chojni que xonhi importancia chonda ngataha nontte, tti chojni que icha chojni rinaoha na jehe, rročho ixin Dios coinchiehe tti chojni que icha chojni xaxaon ixin xonhi rentte, para tjago que ngattoxon con Dios xonhi rentte tti chojni que chonda importancia nttihi ngataha nontte. ²⁹ Jamé joinchehe Dios para que xonhi chojni nchao tsonohe ixin jehe icha jian ngattoxon con Dios. ³⁰ Pero Dios mismo jointtauní jaha ra ngain Jesucristo. Co Dios ndačho cai que de ixin Cristo jána rrochonxin na jian de ixin Dios, co de ixin tti joinchehe Cristo, Dios itoñaoha nganji jána co joxon jian na para ngain Dios, co ixonhi tsonhe almá na. ³¹ Mexinxin inchin ndačho ngain tti jitaxin Palabré Dios: “Si chonja ra rinao ra tsonoha ra orgulloso, tonoha ra orgulloso pero de ngain Dios.”

2

Joajné Cristo que goan crucificado

¹ Ttinihi jaha ra, are janha joasondattjo ra tti ndoa de ixin Dios, janha jointtagondaha palabra anto tangui co ni palabra que nc chegonda chojni anto importante. ² Are janha joarihi ngayaha ra, janha joinaoha conona de icha cosa, jeho de ixin Jesucristo co de ixin quehe rročho que Jesucristo goan crucificado. ³ Are janha joaso nganji ra janha

xa sojiha na co xanga na de joāxaon. ⁴ Co are nichjaha ra co ndattjo ra jehe jian joajné Jesucristo, janha joinaoha jointtaguitticaon jaha ra conixin palabra tangui inchin palabré chojni que anto chonxin. Janha jeha jamé jointtaha, pero conixin Espíritu Santo co joachaxín Dios janha jointtaguitticaon jaha ra. ⁵ Mexinxin jaha ra ditticaon ra ngain Jesucristo ixin vicon ra joachaxín Dios co jeha ixin coinhi ra palabré ná chojni que anto chonxin cosa nttihi ngataha nontte.

*Dios rroanha Espíritu Santo para rrochonxin ni
jehe por ixin Espíritu Santo*

⁶ Pero ixinha jamé, are janha ttji ngayehe tti chojni que ditticaon jian ngain Jesucristo, janha na nichja na conixin palabra tangui. Pero palabra jihi jeha de ixin chojni nttihi ngataha nontte, ni de ixin cain tti ttetonha nttihi ngataha nontte ixin tti nohe chojni nttihi ngataha nontte, mé chonda que ndatsjexin. ⁷ Tti tangui que janha na nichja na joixin de ngain Dios, co mé rročho tti xaxaon Dios para que jehe rrochjá na vida que xonhi tiempo tsjexin. Jihi tti xaxaon Dios icha saho que jehe rrojinchechjian nontte. Pero xagoha nganji na hasta ndavenja Jesucristo. ⁸ Ni ná xí que ttetonha ngataha nontte jihi ttinxinha xa jihi, ixin si rroguittequinxin xa, rrojincherucrificaha xa Jesús que joixin de ngajni. ⁹ Pero conhe inchin jitaxin ngain Palabré Dios:

Cosa que xonhi chojni vicon ni coinha na,
ni xonhi chojni xaxaon,
pero mé tti xaxaon Dios para cain chojni que jehe
na rinao na jehe.

10 Dios jointtagatsoan na cosa jihí de ixin tti Espíritu Santo que jehe rroantha, co Espíritu mé tti chonxin cain cosa co hasta cain cosa que jima ngain Dios.

11 Ixin ¿quensen nchao rrochonxin quehe jiħaxaon ansén iná chojni? Chonda que jeho espiritue chojni mé tti nohe. Jamé cai Espíritu Santo tti nohe quehe īħaxaon Dios. **12** Tti ján na coangui na jeha tti īħaxaon chojni de ngataha nontte jihí; ján na vayé na Espíritu Santo que joixin de ngain Dios para que ján na tsinxin na cain lo que Dios chjá na. **13** Janha na nichja na de ixin cosa jihí conixin palabra que joinchecoanna na Espíritu Santo de Dios, co jeha de ixin palabra que janho na coangui na. Jañá ndačħjan na cosa de Espíritu Santo ngain chojni que Espíritu mé jí ngain.

14 Tti chojni que coha Espíritu Santo ngain, jehe ċħoħa dayé cosa que ttixin de ngain Espíritu mé ixin para chojni mé īonhi xé cain cosa de Espíritu Santo. ċħoħa ttinxin chojni mé cosa de Dios ixin cain cosa mé ċħoħa chonxin na si jian o ni nahi ixin coha Espíritu Santo de Dios ngain na.

15 Pero tti chojni que jí Espíritu Santo de Dios ngain, jehe nchao rrochonxin quehe rročho cain cosa, co īonhi chojni nchao rrondačho de ixin quehe jinchehe jehe tti chojni que jí Espíritu mé ngain. **16** Tti jitaxin Palabré Dios ndačho: “īonhi chojni ttinxin tti jiħaxaon jehe tti chonda cainxin joachaxin. Co īonhi chojni nchao sehe maestro ngain Dios.” Pero ixinha mé, ján na noa na tsje de tti jiħaxaon Jesucristo.

3*Chojni que nchehe xé Dios*

¹ Are janha joarihi nganji ra, hermanos, janha čohoa nichja nganji jaha ra inchin janha rronichja ngain tti chojni que tenchehe inchin rinao Espíritu Santo. Sino que janha nichja nganji ra inchin ngain tti chojni que coha Espíritu Santo ngain. Janha nichja nganji ra inchin are nichja ni ngain xannchinnchinchjan que ḫa chondaha tsje experiencia, jamé jaha ra cai ḫa chonxinha ra jian de ixin Cristo. ² Tti janha jointtacoanha ra tanguiha inchin ná xanletsjochjan que ḫa tai. Dayé xan tsjin en lugar de nio co nda᷑a. Co inchin jamé vintte jaha ra cai. Inchin estomagoe ná xanletsjochjan čohoa dayé nio co nda᷑a, jamé jaha ra cai čohoa coinxin ra tti ttetonha Cristo. Co ni jai ḫa čohoa ttinxin ra ³ ixin jaha ra ḫajeho inchin cain icha chojni. Ixin jaha ra ḫa chjoaha ra, ḫa ningaconhe chó ra, co ḫa chonda ra división. Mexinxin jaha ra jeho inchin cain icha chojni co tenchehe ra inchin nchehe cain chojni. ⁴Ixin are ná ra nda᷑ho ra: “Janha chojní Pablo na”, co iná ra nda᷑ho ra: “Janha chojní Apolo na”; are jaha ra nda᷑ho ra jañá, jaha ra tenchehe ra inchin nchehe cain icha chojni.

⁵ ¿Quensen janha Pablo? co ¿quensen jehe Apolos? Cayoi janha na ḫajeho ninchehe xé Dios co de ixin janha na jaha ra vitticaon ra Jesucristo, tti chonda cainxin joachaxin. Cada na janha na jointtaha na tti ḫa que Dios coetonna na. ⁶ Janha inchin tti ttenga noa ngataon jngui, jamé coín palabré Dios ngain ansean ra; co Apolos inchin

tti chjé jino jinda, ixin jointtanimá ra. Pero Dios tti joinchegangui fe ngain ansean ra inchin are jehe nchegangui jino ngataon jngui. ⁷ Mexinxin xonhi rentte ni tti ttenga noa ni tti chjé jino jinda; jeho Dios tti rentte ixin jehe nchegangui cain cosa. ⁸ Mexinxin tti ttenga co tti chjé jinda xajeho nataonxin, pero Dios ttjenguehe na hna cada na inchin xa que jehe na nchehe na. ⁹ Cayoi janha na compañoero na de ngain xé Dios co jaha ra inchin jngui que Dios jinchehe xa.

O cai, jaha ra inchin ná nchia jie que Dios jinchechjian. ¹⁰ Janha inchin ximaestro albañil co Dios chjana joachaxin para coín base. Co jó ni tet-tette nchia ngataha base. Pero cada na rrochonda na cuidado quexén tsette na nchia ngataha base ¹¹ ixin xonhi iná chojni nchao tsín iná base que jeho base que ojí, co jehe base mé jehe mero Jesucristo. ¹² Co cada maestro nchao tsette quexeho clase de nchia ngataha base jiji, nchia de oro, de plata, co xo que anto fino inchin marmol, o nchia de ntatabla, de ntthanehe co cachji. ¹³ Co are Jesucristo tsí conixin xohi para rrondačho quehe tsonhe, cottimeja tsonohe cada maestro mé quehe clase de nchia dinchechjian. Ixin cada nchia mé chonda que rroche nchia. ¹⁴ Co si chonja maestro dinchechjian nchia que rrocheha, maestro mé rroxenguehe hna. ¹⁵ Pero tti maestro que dinchechjian nchia que ndarroche, maestro mé ndasinchetján cainxin, masqui jehe mismo xonhi tsonhe, co jehe inchin ná chojni que sattingaxin de ngain ná xohi.

¹⁶ ¿Apoco noaha ra que ixin jaha ra tti nih-

ngo para ixin Dios co Espíritu Santo jí nganji ra?
¹⁷ Si čhonja chojni sinchexantte ningoe Dios, Dios sinchexantte jehe chojni mé cai ixin ningoe Dios anto jian ningo ngattoxon con jehe, co jaha ra tti jehe nihngo mé.

¹⁸ Masqui anto noha ra pero ḫaxaonha ra ixin anto ttinxin ra jian. Si ttoha ra tonoha ra que ixin anto noha ra inchin ḫaxaon chojni nttihi ngataha nontte, chonda ra que rrocjan ra inchin tti chojni que ḫonhi nohe para que sintte ra tti chojni que ndoa nohe, ¹⁹ ixin tti nohe chojni ngataha nontte nttihi ḫonhi ḫé para ixin Dios. Tti jitaxin Palabré Dios ndačho: “Dios nchenchehe tti chojni que anto nohe para que tti jehe na nchehe na ḫonhi ḫé.” ²⁰ Cai ndačho ngain Palabré Dios: “Jehe tti chonda cain joachaxin nohe que ḫonhi rentte tti ḫaxaon cain chojni que anto nohe.” ²¹ Mexinxin ni ná jaha ra chondaha ra que tonoha ra orgulloso ixin tangui ra de ngain ná chojni maestro, ixin cainxin maestro co cainxin cosa jian Dios chjá ra para tsjenguijna ra ngain tti ditticaon ra. ²² Pablo, Apolos, Pedro, ngoixin mundo, vida, tti ndadenhe ni, tiempo jaxon, tiempo tsí, cainxin mé para tsjenguijna jaha ra. ²³ Co jaha ra chojní Jesucristo co Jesucristo joixin de ngain Dios.

4

Tti xa que joinchehe cain nirepresentanté Jesucristo

¹ Jañá chonda ra que rro᠁axaon ra que janha na jeho ninchehe ḫé Jesucristo. Janha na tti vitonna na para rronichja na tti jima de ixin Dios. ² Nchao

remé, ná tti ditonhe ná cosa chonda que sinchehe cosa mé jian para jamé chojni sicon na que jehe ná chojni de confianza. ³ Pero para ixin janha, antoha tá joachjaon de ixin tti nichja chojni de ixin janha, jaha ra o ngain ná juzgado tti ttetonha chojni nttihí ngataha nontte. Ni janha mismo ndačhjanha ixin anto jian rrinttaha. ⁴ Masqui janha ḫaxanho que ḫonhi jianha rrinttaha, pero mé ḫa rročhoha ixin janha anto jian na. Jesucristo, tti chonda cain joachaxin, mé tti rrondačho ixin quexén na janha. ⁵ Mexinxin jaha ra ndačhoha ra icha saho ixin quehe tenchehe icha chojni; jaha ra chonhe ra hasta are tsí Jesucristo, tti chonda cain joachaxin, co jehe sinchenonxin cain tti jima ngain tti naxin xehe. Co jehe sinchenonxin cain tti te᷑axaon ansén cada chojni. Cottimeja Dios rrochjé cada chojni inchin tequininxin na.

⁶ Janha rrindattjo ra cain cosa jihí para tsjenguijna jaha ra. Janha co Apolos ná ejemplo para ixin jaha ra para que icha jian tsinxin ra. Janha ndačhjan jañá para que de ixin ejemplona na jaha ra tsangui ra sitticaon ra jeho tti ttetonha Dios, co para que ni ná ra tsonoaha ra orgulloso de ngain ná chojni co sincheha ra caso iná chojni. ⁷ ¿Quedonda ḫaxaon ra que jaho ra tti icha jian ra? ¿Quehe cosa chonda ra que jeha Dios chjá ra? Jehe Dios chjá ra cain cosa que jaha ra chonda ra, mexinxin ¿quedonda tonoha ra orgulloso ixin cain cosa que jaha ra chonda ra jeho conixin joachaxian ra chondaxin ra?

⁸ Jaha ra tonoha ra que anto tsje cosa que joixin ngain Dios chonda ra, co chonda ra cain tti jaha ra rinao ra. Tonoha ra inchin rey, co janha na

ndacointtona ni ra iná lado. ¡Icha jian si ndoa jaha ra rrroguintte ra rey para que janha na rroquettonha na cai ngain tti jaha ra ttetonha ra! ⁹ Janha tonona que janha na xo representanté Jesucristo na Dios cointtona na hasta tti último lugar. Janha na inchin tti chojni que tequininxin ndadenhe, janha na inchin ná joaixoan que chojni ngoixin mundo dicon na na. Dicon na cain ángel cai. ¹⁰ Cain chojni ndačho na que ixin janha na chojni que xonhi chonxin ixin ditticanho na Jesucristo, co jaha ra tonoha ra que ixin anto ttinxin ra cain cosa de Jesucristo. Janha na xonhi importancia chonda na para ngain chojni co jaha ra tonoha ra anto importante ra. Cain chojni nccheha na na caso janha na, co jehe na chonda na respeto nganji ra. ¹¹ Hasta jai janha na denhe na jintta co jinda co xonhi xé lontto que chonda na, co tsje chojni feo ncchehe na nganji na co chondaha na nchia tti sintte na, ¹² co tončhen na ixin anto nttaha na xa conixin rana na. Nichja chojni feo nganji janha na, pero janha na nttsán na ñao Dios que jehe sinchenchaon jehe na. Chojni feo ncchehe na nganji na pero janha na ttixinna na. ¹³ Nichja na cosa ndoaha de ixin janha na, pero janha na chjaha na na consejo conixin paciencia. Nchehe na nganji na inchin ncchehe na ngain caxineno ngataha nontte; hasta jai tonna na ngain na inchin tti ixonhi xé de ngain chojni.

¹⁴ Janha rricjianha ra cain cosa jihí para tsosoaha ra, jeho para rrichjaha ra ná consejo ixin jaha ra inchin xanhna que anto rinaho ra. ¹⁵ Co masqui jaha ra rrochonda ra hasta dies mil

maestro que sinttacoanha ra de ixin Jesucristo, pero cain mé ūa sintteha inchin ndodá ra. Janha tti ndodá ra de ngain confianzé Jesucristo ixin janha tti joasondattjo ra de ixin tti jian joajna, co mexinxin Jesucristo chjá ra iná vida naroaxin are vitticaon ra joajna mé. ¹⁶ Mexinxin janha nttsanha ñao ra que rroeha ra ejemplona.

¹⁷ Janha rrrorroanha Timoteo nganji ra co jehe inchin xanhna que anto rinaho ixin jehe ditticaon jian ngain Jesucristo. Jehe Timoteo tti sinttaxaon ra quexén janha nttaha ixin ditticanho Jesucristo co quexén janha nttacon Cainxin chojni que ditticaon Jesucristo ngain Cainxin rajna. ¹⁸ Canxion jaha ra atto tonoha ra orgulloso ixin ūaxaon ra que janha ūaon na para sasotsjaha ra iná. ¹⁹ Pero janha rinaho que toin saso para sasotsjaha ra, si Jesucristo rinao. Cottimeja janha sicon si jaha ra ūo tonoha ra anto orgulloso, ndoa chonda ra joachaxín Dios o ni nahi. ²⁰ Ixin are Dios ottetonha ngain ansén ná chojni, mé nichjacoaha ixin palabré cai chonda joachaxín Dios. ²¹ ¿Quehe rinao jaha ra remé are janha saso? ¿Asaso para sinttacastigá ra o ni saso para rronichjaha ra chjoin?

5

Pablo ndačho ixin quehe tsonhe chojni que nchehe jianha

¹ Tenohe tsje chojni ixin ná de jaha ra techonda ra jeho jannajonha ra de čhiha ra. Co jehe yá ná cosa anto jianha que ni tti chojni que ditticaonha Dios ūa ncheha na jañá. ² ¡Co jaha ra ūa tonoha ra

ixin anto jian ra en lugar de rroguinttechinhi ra co rrocosoaha ra! Tti chojni que jinchehe cosa jianha yá jaha ra chonda ra que dantsjeyexin ra de nganji ra. ³ Masqui janha mero rriha nganji ra, pero janha ōxaxanho de ixin quehe tsonhe tti xí que jinchehe jianha yá inchin janha mero rrojarihi nganji ra. ⁴ xatte cainxin ra de ixin nombré Jesucristo, tti chonda cainxin joachaxin para ixin ján na, co joarrixonna sehe nganji ra, co joachaxín Jesucristo sehe nganji ra. ⁵ Cottimeja tti xí que jinchehe cosa jianha yá nccheha ra consiente ngain ningoa ra; tančhjanda ra Satanás para sinchehe inchin jehe rinao ngain cuerpo e xí mé. Co puede jamé jehe xa sačhjenda xa de cosa jianha que ncchehe xa para que xonhi tsonhe espiritu e xa are tsí Jesucristo, tti chonda cainxin joachaxin.

⁶ Jaha ra chondaha ra que tonoha ra orgulloso. ¿Anoaha ra que si ná chojni jinchehe cosa jianha ngayaha ra, sicon icha chojni co jehe rročaxaon sinchehe jamé cai? ⁷ Denguxin ra de nganji ra tti chojni que jinchehe jianha yá para que cainxin ra sintte ra joxon chojni que xonhi jianha chonda. Jesucristo ondavenhe para ixin ján na inchin cain coleco que ndavaguenhe ngain quié pascua para que Dios vanchetjañehe na tti jianha que vanchehe na. ⁸ Mexinxin ján na rrochá na ngain jehe co sontte na jian ngain vidá na inchin rinao Jesucristo co ttinttohe na nondaha tti vida jianha que nchaoha jí que ján na jointtoho na. Co jai ntto sayehe na Jesucristo conixin vidá na jian que xonhi jianha tenttoho na inchin tti niottja que chondaha levadura para tosayexin Dios.

⁹ Ngain saho cartana que rroanha ra joint-tatsanha ñao ra que tatoha ra tti chojni que ncheñoxinhi dinttejoacaho icha nčhí que jeha nčhičhihi. ¹⁰ Pero janha ndačhjanha que ixin ndasačhjendehe ra cain chojni de ngain mundo, rročho tti chojni que ditticaonha Jesucristo. Ndoa, que chojni que ditticaonha Jesús ncheñoxinhi na dinttejoacaho na icha nčhí que jeha nčhičhihi na, co jehe na anto rinao na rrochonda na icha co icha cosa, co jehe na chehe na, co jehe na nchesayehe na ídolo. Co para que jaha ra te ra ngataha nontte jihi, jaha ra chonda ra que sintte ra ngayé cain chojni yá. ¹¹ Pero janha ndačhjan que jaha ra chonda ra que sačhendehe ra cain chojni que ndačho ixin ditticaon na Jesucristo co ūa nchehe na cosa jianha. Inchin puede ncheñoxinhi na dinttejoacaho na icha nčhí que jeha nčhičhihi na, o rinao na rrochonda na icha co icha cosa, o nchesayehe na ídolo, o ncheñoxinhi na nichja na feo de iná chojni, o ncheñoxinhi na coan na, o ttehe na cosé iná chojni. Tti chojni de jaha ra que nchehe jaňá ni para sinttecoho ra chondaha ra que tsonchienhe ra ngain. ¹² Janha ūonhi joachaxin chonda para rrondačhjan de ixin quehe tenchehe tti chojni que ditticaonha Cristo. Pero jaha ra chonda ra que rrondačho ra de ixin tti jianha que tenchehe tti chojni que ditticaon Jesucristo inchin jaha ra. ¹³ Co tti chojni que ditticaonha Cristo, Dios tti rrondačho de ixin quehe tenchehe na, ¿ajian o ni nahi? Pero jaha ra chonda ra que rrondačho ra de ixin quehe tenchehe tti chojni que ditticaon Jesucristo. Mexinxin jaha ra dantsjeyehe ra de ngayaha ra tti xí que jinchehe cosa jianha yá.

6

Are chojni coeto na ngain xijuez que vaguitti-caonha Jesucristo

¹ Are čhonja ra rrochonda ra ná cosa que tsjanguí ra de ixin iná chojni que ditticaon Jesucristo, nchaoha jí si jaha ra sicjangui ra ngain xijuez que ditticaonha Jesucristo en lugar de rroguejangui ra ngain xajeho chojni que ditticaon Jesucristo para que jehe chojni mé rrondačho quex-ehe ra xo chonda ra razón. ² ¿Apoco noaha ra que ngain tiempo que tsí chojni que ditticaon Jesús sinchejuzguehe na chojni que ditticaonha Jesucristo? Mexinxin jai, ¿quedonda jeha jaho ra nczechjian ra cain asunto icha tanguiha que jaha ra chonda ra? ³ ¿Apoco noaha ra que jána nchao sonttojuzguehe na hasta ángel? ¡Co mé chojni que ditticaon Jesucristo ngain tiempo jihí čohoa xijonttonhe na ná jie! ⁴ Co are jaha ra chonda ra problema de ngain tiempo jihí, ¿quedonda dic-jangui ra ngain xijuez que ditticaonha Jesucristo? ⁵ Janha ndačhjan yá para que rrochonda ra joasoaxin. ¿Apoco coha ngayaha ra ni ná chojni que nohe jian para que jehe chojni mé tti rrojintta-juzgaha ra cain jaha ra xo ditticaon ra Jesucristo? ⁶ ¿Apoco jiquinixin que ná chojni que ditticaon Cristo sičho jie de ixin iná chojní Jesucristo ngain xijuez que ditticaonha Jesucristo?

⁷ Mexinxin atto nchaoha jí tteto ra jaho ra. Icha jian si ttixinha ra are nicompañeroa ra feo sinchehe na nganji ra. Co icha jian si jaha ra toňaoha ra are tsaha ra na cosá ra. ⁸ Pero jaha ra en lugar de rrojinchehe ra jamé, jaha ra ncuhehe

ra feo cai inchin jehe na, co cai hasta ttehe ra cosé xajeho chojni que ditticaon Jesú.

9-10 ¿Apoco noaha jaha ra que tti chojni que ncheha jian seha ngain parte tti ttetonha Dios? Dittoaxinha ra sinttayaha ra na ixin ngain parte tti ttetonha Dios choha sintte tti chojni que puro ncheoxinhi tsontaonxin nčhí co doanha nčha nčičhihi, ni chojni que nchesayehe ídolo, ni chojni que ncheoxinhi dinttejoacaho icha nčhí que jeha nčičhihi, ni xí que chonda xajeho iná xí inchin rrocji nčičhihi, ni tti chehe que tté cosé iná chojni, ni chojni que anto rinao rrochonda icha co icha cosa de ngataha nontte, ni chojni que puro coan, ni chojni que nichja cosa ndoaha ngain iná chojni, ni tti chojni que nichja ná cosa seguro co jehe ncheha. Tonoha ra jian que cainxin chojni yá choha sintte ngain parte tti ttetonha Dios. **11** Canxion jaha ra jañá vanchehe ra cai, pero Jesucristo, tti chonda cainxin joachaxin, co Espíritu Santo que Dios rroanha ojointtaroa ra de cain cosa jianha que joinchehe ra, co jointtajoxon ra chojni jian, co mexinxin Dios vayé jaha ra co ndačho que jaha ra joxon chojni jian que xonhi jianha chonda ra.

Tti jiquininxinha sinchehe ni ngain cuerpoe ni

12 Jehe ni ndačho ni que nchao sinchehe ni cain tti sinao ni. Co ján ndoa, pero jeha cainxin mé jian para ixin jehe ni. Si ná ni sinchehe ni lo que sinao ni, pero sicao ni cuidado que ni ná cosa mé tsetoanha ngain cuerpoe ni. **13** Ján, ndoa que cain tti jine ni sattji para ngain tsejnoe ni co tsejnoe ni para tti jine ni, pero cayoi cosa mé ndatsjexin

are ndasenhe ni. Pero jeha ndoa que cuerpo ni para ngain iná nchí que jeha nchiichihi ni; cuerpo ni jeho para ixin Jesucristo, tti chonda cain joachaxin, co Jesucristo jí para ixin cuerpo ni. ¹⁴ Co jañá inchin Dios joinchexechon Jesucristo, jamé sinttaxechon na jána cai conixin joachaxín jehe.

¹⁵ ¿Apoco ttinxinha jaha ra que cada cuerpo que jaha ra chonda ra, mé ná parte de cuerpo Jesucristo? ¿Apoco nchao tsá na ná de tti parte de jehe cuerpo Jesucristo para sanjo na ngain cuerpo ná nchí que dachaxin tomi cuerpo? ¡choha sonttoho na jamé! ¹⁶ ¿Apoco noaha jaha ra que are ná xí dejacaho xa ná nchí que dachaxin cuerpo tomi, cayoi na tonchjian na inchin nacoa cuerpo? Ngain tti jitaxin Palabré Dios ndačho: “Cayoixin chojni sintte na inchin nacoa chojni.” ¹⁷ Pero are ná chojni ditticaon ngain Jesucristo, chojni mé co Jesucristo dintte na inchin nacoa chojni ixin chonda jehe na xajeho Espíritu Santo.

¹⁸ Mexinxin janha rrindattjo ra que dinttečhincoha ra nchí que jeha nchiichiha ra. Xonhi iná cosa icha jianha para ixin cuerpo ni, jeho cosa mé ixin are ná chojni nchehe cosa jianha yá, jeho nchehe jianha ngain cuerpo. ¹⁹ Jaha ra noha ra que cuerpa ra mé ningoe tti Espíritu Santo que Dios chjá ra, co Espíritu Santo jí ngaxinhi cuerpa ra. Jeha jaha ra tti ttetonha ra ngain cuerpa ra, ²⁰ ixin Dios anto rentte cjoenga hna para ixin cuerpa ra. Mexinxin chonda ra que nchesayehe ra Dios de ngain cuerpa ra co de ngain espiritua ra ixin cayoi cosa mé cosé Dios.

7

Consejo para chojni que tecao chó

¹ Jai rrondattjo ra tti jaha ra joanchianguina ra ngain cartá ra. Ján ndoa, jian para que xí secaoha xa nčhí. ² Pero ixin anto tsje chojni puro rinao tsontaonxin chó, mexinxin icha jian si cada xí rrochonda xa nčhičhihi xa co cada nčhí rrochonda nčha xixihi nčha. ³ Co xixihi nčhí chonda xa que sinchehe xa inchin jiquininxin ngain nčhičhihi xa, co cai nčhí chonda nčha que sinchehe nčha inchin jiquininxin ngain xixihi nčha. ⁴ Cuerpoe nčhičhihi ná xí jeha jehe nčha tti cuerpoe nčha ixin cuerpo mé jiquininxin xixihi nčha. Co xajeho ngain xixihi nčhí cai, nčhičhihi xa tti jiquininxin cuerpoa xa. ⁵ xo nčhí ra, are xixiha ra sinao xa cuerpoa ra ndačhoha ra que nahi, co cai jaha ra xo xí ra, are nčhičhiha ra sinao nčha cuerpoa ra, cai ndačhoha ra que nahi. Jeho si jaha ra sinao ra rrochjeha chó ra cuerpoa ra ixin sinchecoanxinihi ra Dios. Cottimeja nchao rrochjeha chó ra cuerpoa ra ixin puede tsixianha ra sé tiempo, co puede Satanás rrondattjo ra co sinchehe ra cosa jianha.

⁶ Janha rrindattjo ra cain jihi, co rročho que janha rridanjo joachaxin que nchao sinttecoho chó ra si jaha ra sinao ra, co cai nchao si jaha ra sinaoha ra sinttecoho chó ra. ⁷ Janha rrojinaho que cain jaha ra xonhi nčhí rroguinttecoho ra inchin janha, pero cada na Dios chjá na joachaxin de quexén sontte na; ttoha na sonttecoho na nčhí co te na nahi.

⁸ Cain chojni que xa tecaooha chó co cain nčhiganha que xonhi xí tecao, janha ndačhjan

que icha jian para ixin jehe na si ixonhi nchí o xí sinttecao na; janhi inchin janha. ⁹ Pero si jehe na tsixinha na, nchao tsjé na nchičhihi na o xixihi na ixin icha jian rrochonda na nchičhihi na o xixihi na que puro rrojaxaon na de ixin nchí o de ixin xí.

¹⁰ Pero cain ra xo otecoho ra nchičhiha ra o xixiha ra, janha rrittetonha ra que nchí tsinttoeha ncha xixihi ncha. Tti janha rrittetonha jiji joixinha de ngain joarrixonna, sino que joixin de ngain Jesucristo, tti chonda cain joachaxin. ¹¹ Pero si ná nchí sačhjendehe ncha xixihi ncha, jehe ncha choha secao ncha iná xí, pero xa nchao rrocjanttehe ncha xajeho xixihi ncha. Co xajeho ngain xixihi ná nchí cai, jehe xa choha sačhjendehe xa nchičhihi xa.

¹² Icanxin chojni ndattjan na inchin janha nona, ixin xonhi coetonha Cristo de ixin jiji. Si ná xí que ditticaon Jesucristo co chihi xí mé ditticaonha ncha, pero si jehe ncha jí ncha conforme para tasecao xí mé ngoixin vidé ncha, jehe xí mé chondaha xa que tsinttohe xa nchičhihi xa. ¹³ Si ná nchí ditticaon Jesucristo co xixihi ncha nahi, pero si jehe xa jí xa conforme para tasecao xa nchí mé ngoixin vidé xa, cai jehe nchí mé chondaha ncha que sačhjendehe ncha xixihi ncha mé. ¹⁴ Ixin tti xixihi ná nchí que ditticaonha xa Jesucristo co jehe ncha ditticaon ncha, Dios ojoinchenchaon xí mé ixin jehe xa jicao xa nchí que ditticaon Jesucristo. Co nchičhihi ná xí que ditticaonha ncha Jesucristo co jehe xa ditticaon xa, cai nchí mé Dios ojoinchenchaon ncha ixin jehe ncha jicao ncha xí que ditticaon Jesucristo. Si jeha jamé, xanha

ra sintte xan inchin xenhe chojni que ditticaonha Jesucristo, pero ixin masqui jeho ná ra ndoa dit-ticaon ra Jesucristo, mexinxin cai xanha ra Dios ojoinchenchaon xan. ¹⁵ Pero si xixihi ná nčhí o nčhičhihi ná xí que ditticaonha Jesucristo sinao sachjendehe xixihi o nčhičhihi, tančhjanda ra na sinchehe na. Cottimeja tti xí o tti nčhí que ditti-caon Jesucristo chonda libertad, ixin Dios rinao que tti chojni que ditticaon Jesucristo sintte na čhjoin ngain vidé na. ¹⁶ Co si jaha ná nčhí, ¿queξén noanxin ixin anchao tsjenguijna xixiha para sitticaon xa Jesucristo? O si jaha ná xí, ¿queξén noanxin ixin anchao tsjenguijna nčhičhiha para sitticaon nčha Jesucristo?

¹⁷ Mexinxin cada chojni chonda que sintte na ngain vidé na de acuerdo conixin tti joachaxin que joanjo Jesucristo co inchin jehe na vintte na are Dios vayé na. Jañá ttetonha janha ngain cain chojni que ditticaon Jesucristo. ¹⁸ Si Dios vayé chojni que chonda xohe que dini circuncisión ngain cuerpo, chojni mé chonda que jamé sittohe conixin xohe mé. Co si Dios vayé chojni que chon-daha xohe que dini circuncisión ngain cuerpo, chojni mé chondaha que rrochonda xohe. ¹⁹ Ixin jeha importante para que cain chojni rrochonda xohe mé; tti importante que cain na sitticaon na cain tti ttetonha Dios. ²⁰ Cada chojni chonda que sintte na inchin vintte na are Dios vayé na. ²¹ Si jaha joarihi ná ninchehe xa que dicochji ngain xinajni are Dios vayaha, jaha taha joachjaon de ixin mé. Masqui jamé, si jaha chonda oportunidad de sarihi libre, nchao, ixin icha jian sarihi libre.

²² Tti chojni que vehe ninchehe ḫa que dicochji ngain xinajni are Dios vayé na para que jehe na vitticaon na ngain Jesucristo, jai jehe na te na libre para ngain ḫé Jesús. Co cai, tti nivintte libre are Dios vayé na, jai jehe na te na inchin tti nchehe ḫa que tochji pero de ngain Jesús. ²³ Dios anto rentte coenanxin jaha ra, mexinxin dittoaxinha ra para que iná chojni tsetonha ra. ²⁴ Jañá, cada ra dintte ra ngattoxon con Dios inchin jaha ra vintte ra are Dios vayaha ra.

²⁵ Co cain chojni que ḫa tecoha nchí o xí, janha ḫa ḫonhi tsetoan na ixin Jesucristo ḫonhi coetonha de ixin jehe na, pero janha rrondattjan na tti janha ḫaxanho ixin tti janha ḫaxanho jehe jian ixin Dios chjana tti janha ḫaxanho. ²⁶ Cain chojni que ditticaon Jesucristo tiempo jai atto tsje peligro tetonchienhe ngain na, co tiempo inchin jihi, para ixin janha, puede icha jian para cain chojni que ḫa dinttecaoha nchí o xí, isinttecaoha chó na. ²⁷ Pero tti chojni que otecao čhihi o xixihi irroxaxaonha na para tsinttohe chó na. Pero tti chojni que ḫa dinttecaoha chó, icha jian irroxaxaonha na para sinttecao chó na. ²⁸ Pero si sinttecao chó na cai nchao jí ixin mé jeha cosa jianha. Cai si ná xannchí secao xan xixihi xan, cai mé jeha jianha sinchehe xan. Pero tti chojni que sinttecao chó rrochonda na problema ngain vida jihi, co janha rinaho que rrochondaha na problema mé.

²⁹ Janha rinaho rrondattjo ra ixin atto tsjeha tiempo dittoá na jai pa ndaha. Mexinxin cain chojni que tecao čhihi o xixihi chonda que sinchehe na ḫé Jesucristo como si rrochondaha na čhihi na o xixihi na. ³⁰ Co tti chojni que anto techín,

chonda que sintte na como si xonhi joachjaon rroguinttechonda na. Co tti chojni que techonda quiai, chonda que sinchehe na como si xonhi quiai rroguinttechonda na. Co tti chojni que coehna na cosa, chonda que sintte na como si rrochondaha na cosa mé. ³¹ Co tti chojni que anto nc chegonda na tti cosa que jí ngataha nontte, chonda que sintte na como si rrojinchegondaha na cosa mé, ixin mundo jihí que jána docon na ondajittjexin.

³² Janha rinaho que jaha ra rrochondaha ra joachjaon. Are ná xí que xonhi nchí jicao, jehe xa icha xaxaon xa de ixin Dios co nc hehe xa xé Dios ixin rinao xa que Dios nc heoxinhi tti jehe xa nc hehe xa. ³³ Pero are ojicao xa nchí, jehe xa icha xaxaon xa cain cosa de ngataha nontte jihí, co para que chihi xa nc heoxinhi nchá tti jehe xa nc hehe xa. ³⁴ Cai jí diferencia de ngain nchí que tecao xí conixin nchí que tecao ha xí. Nchí que tecao ha xí icha xaxaon nchá cosa de Dios para que te nchá jian ngain Dios de ngain cuerpo e nchá co de ngain espiritu e nchá. Pero tti nchí que tecao xí icha xaxaon nchá cosa de ngataha nontte jihí co para que xixihi nchá sincheoxinhi xa tti jehe nchá tenchehe nchá.

³⁵ Janha rrindattjo ra cain jihí pero jeho para tsjenguijnanxin ra, jeho para que jaha ra isintt-coha chó ra ndoa. Janha rinaho que sinchehe ra cain cosa inchin jiquininxin co rinaho que cain tiempo sinchehe ra jian xé Jesucristo, tti chonda cain joachaxin.

³⁶ Pero si ná chojni xaxaon que icha jian para que xenhe secao xan xí, ixin ojidattohe xan de xannchí, co si para ixin jehe chojni mé jihí tti icha

jian, nchao sinchehe remé. Nchao secao xenhe chojni mé xí. Mé jeha cosa jianha para ixin Dios.

³⁷ Pero si ná chojni ḥaxaon que xenhe secaoha xan xí co si ndoa jehe jamé rinao sehe xenhe, cai chojni mé nchao ncchehe. ³⁸ Jañá, tti rinao que secao xenhe xí nchao ncchehe, co tti rinaoha que secao xenhe xí icha nchao ncchehe.

³⁹ Ley de Dios ndačho que tti nčhí que tecao xixihi, jehe nčha chonda que sitticaon nčha tti rrondačho xixihi nčha hasta ndasenhe xa. Pero si xixihi nčhí mé ndasenhe xa, jehe nčha sittohe nčha libre para secao nčha quexeho xí que jehe nčha sinao nčha, pero ná xí que ditticaon Jesucristo. ⁴⁰ Pero janha ndačjan que jehe nčha icha feliz sehe nčha si ixonhi xí secao nčha, jihí tti ḥaxanho janha, co toenaho que tti janha rrindattjo ra jihí joixin de ngain Espíritu Santo que Dios rroanha.

8

Tti danjo chojni ngain ídolo

¹ Janché rrondattjo ra quehe rročho tti danjo chojni ngain ídolo. Ján, ndoa que cain na ḥaxaon na que chonxin na co noa na jian de ixin cosa jihí, pero tti ján na noa na, mé ḥonhi ḥé ixin anto tonoa na orgulloso. Pero si sonao chó na, mé tti sinttasoji na ngain tti dotticaon na de ixin Jesucristo. ² Si čhonja chojni tonohe que jehe anto nohe pero jehe ḥa ḥonhi nohe ixin ḥa ditján tti jiquininxin tsonohe. ³ Pero tti chojni que rinao Dios, Dios jí ngain chojni mé.

⁴ Mexinxin, ¿quehe chonda na que sonttoho na? ¿Asontte na tti nttao que ttinki na ídolo? Ján, ndoa

noa na jian que ná ídolo nažoinxon joachaxin chonda ngain cain chojni, ixin jí jeho nacoaxinxon Dios. ⁵ Canxion chojni ndačho que ixin jí tsje dio que chonda joachaxin ngajni co nttihi ngataha nontte, co jehe na ncheguinho na, señor. ⁶ Pero jáñ na noa na que jí nacoaxinxon Dios, tti Ndodá na. Ndo mé Ndo joinchechjian cainxin cosa, co jáñ na te na para ixin jehe Ndo. Cai jí nacoaxinxon tti dinihi Señor, co jehe mé Jesucristo. De ixin jehe jixin cainxin cosa, hasta jáñ na texin na cai.

⁷ Pero cainxinha chojni nohe jihi. Canxion ni-ditticaon Jesucristo jai vintte na acostumbrado de vanchesayehe na ídolo. Co jai xá ttinxinha na jian de ixin Jesucristo. Mexinxin are jine na tti nttao que dehe na ngain ídolo, tonohe na feo ixin xá xagoen na ídolo mé. ⁸ Seguro que Dios ndosenha si jáñ na sontte na nttao mé o ni nahi. Jeha icha jianha na si sontte na nttao mé, ni jeha icha jian na si sontteha na nttao mé. ⁹ Pero ttjihor a cuidado de ixin tti joachaxin que jaha ra coá ra de ixin sintte ra cain cosa, ixin puede de ixin tti sinchehe ra jaha ra icha chojni sinchehe na jianha ixin xá ttinxinha na jian de ixin Jesucristo. ¹⁰ Nttihi jí ná ejemplo: si ná de jaha ra xo ojian ttinxin ra de ixin Jesucristo, co noha ra de ixin cain cosa jihi sintte ra sintte ra ngain lugar tti icha chojni nchesayexin ídolo co sicon ra iná chojni que xá ttinxinha jian de ixin Jesucristo, chojni mé nchao rrožaxaon sine cai tti cain cosa que saquehe na ngain ídolo. ¹¹ Jañá jaha ra ixin ottinxin ra jian sinchetján ra iná chojni tti xá ttinxinha jian, co Jesucristo venhe cai para ixin chojni mé. ¹² Mexinxin are jaha ra sinchetján ra

tti chojni que ḫa ttinxinha jian de ixin Jesucristo, jaha ra cai rročho que sinchehe ra jianha ngain mero Jesucristo. ¹³ Mexinxin, si janha sinttatján tti chojni que ḫa ttinxinha jian de ixin Jesucristo are jehe chojni mé sicon na janha sine tti nttao que daquehe na ídolo, icha jian ḫonhi tiempo janha sine nttao mé para sinttatjanha chojni mé ngain cosa jianha.

9

Derecho que chonda ná representanté Jesucristo

¹ Ján, ndoa que janha chonda joachaxin co cain derechoe ná representanté Jesucristo. Janha vicon Jesucristo, tti chonda joachaxin para ixin jánna, co jaha ra tti ḫa que janha jointtaha para ixin jehe. ² Puede icanaxin chojni ḫa chonxinha na na janha ixin janha ná representante na. Pero jaha ra chonda ra que chonxin ni ra janha ixin janha tti ndattjo ra para que jaha ra vitticaon ra ngain Jesucristo, co yá ná prueba que ndoa janha ná representante na de Jesucristo.

³ Co jihu tti rrondačhjan ngain cain chojni que ncheḥoxinha tti janha rrinttaha: ⁴ janha chonda derecho de sayá cain tti rrochjana na para sine co cain tti rrochjana na para sihi, ⁵ co cai para rrochonda ná čihna que ditticaon nčha Jesucristo sacjinha nčha ngain viajena tti čhji, jañá inchin nchehe tti icanaxin representanté Jesucristo inchin Pedro co xanchó Jesús. ⁶ ¿O apoco ḫaxaon ra que janho co Bernabé tti tequinixin na sinttaha na yó ḫa ngain nacoa tiempo? ḫa para sachaxin na tomi que sondana na, co ḫa de rrondattjo ra tti

jian joajna. ⁷ ḵaxaon ra jian que ḵonhi xisoldado jí que jehe xa ttjenga xa hna cain gastoe xa. Co ḵonhi chojni que ttjenga nttauva que jehe jineha ttochjoín ntta. Co ḵonhi chojni que ttingaria coleco que jehe diha tsjini va. ⁸ Co ḵaxaonha ra ixin jeho xí ngataha nontte ḵaxaon jihí, ixin cai Dios coetonhe Moisés para coentaxin de ixin jihí ngain libro tti jitaxin ley de Dios. ⁹ Co ngain libro mé jitaxin: “Ttengueha ra coxinttaha nchisen are tondai va trigo.” Dios ndačhoha jihí de ixin jeho coxinttá, ¹⁰ jehe ndačho jañá para ná ejemplo para ixin jáñ na. Ley jihí jian para ixin jáñ na ixin tti nchehe ḵa ngataon jngui co tti tondai trigo chonda na derecho de sayé na parte de cosecha. ¹¹ Mexinxin, si janha na coenga na ngayaha ra palabré Dios, ¿apoco tonoha ra atto tsje si jaha ra rrochjana ra nchion tomi para sinenxin na? ¹² Si icaxin chojni chonda na derecho jihí de chhehe ra na tomi, mé icha janha na.

Pero janha na ntagondaha na derecho que janha na chonda na. Janha na ntahaa na icaxin ḵa para dachaxin na tomi que dondana na co para que jaha ra, ḵo rinao ra sitticaon ra tti jian joajné Jesucristo, tsonoaha ra molestia de ixin janha na. ¹³ Jaha ra noha ra que tti nchehe ḵa de ngain ningoie chojni judío de ngain nihngo sachaxin na tti sine na. Rročho que tti chojni que nchehe ḵa ngain alté Dios, tti ttín na nttaohe coxigo para ixin Dios, chojni mé jine tti nttao que dehe nttiha. ¹⁴ ḵajeho cai, Jesucristo ndačho que tti chojni que nichja tti jian joajna, chojni mé de ngain ḵa mé sachaxin na tti sine na. ¹⁵ Pero janha ḵonhi tiempo joint-

tagonda ni ná derecho jihi, ni cai jeha rricjinha ra jihi para que jaha ra rrochjana ra nchin tomi. ¡Para ixin janha icha jian si saho ndasenxin na jintta que ná chojni santsjena tti čhjoin que tsonohe ansenna de ixin jihi!

¹⁶ Janha nichja tti jian joajna ngain chojni pero rinaoha que chojni sinchesayana ixin Dios coetonna que rronichja joajna mé. Co anto tangui tsonna si janha rrondačhjanha joajna jihi. ¹⁷ Si janho rroguinchía xá jihi, Dios rrocjengana hna. Pero jeha jamé ixin xá jihi ná responsabilidad que Dios chjana, co čhoa rrondattjan que nahi. ¹⁸ Mexinxin tti anto čhjoin tonona are ndattjan chojni tti jian joajna, jihi tti xenga na hna co xonhi chojni ndattjan ixin tsjengana hna tomi. Rročho janha ntagondaha derechona para rrogacha tomi de ngain xana ixin janha nichja tti joajna mé.

¹⁹ Masqui janha jeha ninchehe xé de ni ná chojni, janha goan na ninchehe xá de cainxin chojni para dacha icha chojni para ixin Jesucristo. ²⁰ Are janha rrihi ngayé chojni judío janha cjan na inchin chojni judío para dacha jehe na para ixin Jesucristo. Rročho para tti anto ditticaon ley que vayé Moisés, janha cai ditticanho ley mé para que janha dacha jehe na, masqui janha chondaha que nttaha inchin ttetonha ley mé. ²¹ Co para que janha dacha para ixin Jesús tti chojni que nccheha inchin ttetonha ley que vayé Moisés, janha cjan na inchin jehe na cai. Masqui jáñ, janha nttaha inchin ttetonha ley de Dios ixin janha jáñ orrintaha inchin ttetonha ley de Jesucristo. ²² Co are janha

rrihi ngain chojni que xa ttinxinha jian de ixin Jesucristo, janha nttaha inchin costumbré jehe na para que janha chonda oportunidad de ndattjan na icha de ixin Jesucristo, jamé nttaha para que jehe na icha ttinxin na. Rročho janha darihi inchin cada naná jehe na para que jamé nchao Jesucristo tsjenguijna canxion na para xonhi castigo rrochonda na de cain cosa jianha que ncuhehe na.

²³ Ján, nttaha cain jihi para que nttaoa chojni tti jian joajna co para que janha cai rrochonda tti jian que Dios danjo.

²⁴ Jaha ra onoha ra que ngain ná juego de carrera cain ni ttinga ni pero jeho nacoaxinxon tti dacha. Jamé ttinga jaha ra cai para que jamé sacha ra. ²⁵ Cain tti chojni que doan preparado cuerpoe para rrotsontaon ngain ná juego, chojni mé jineha cosa que sinchehe daño co ncuheha cosa que sinchehe daño ngain cuerpoe. Co cain chojni mé ncuhehe na jamé jeho para dacha na ná premio jeho ná corona de qué nttaurel que tončhjenha sé. Pero ján na nttoho na lucha para que sacha na ná premio que tsončhjenhe para cainxin tiempo. ²⁶ Para ixin janha jeha jamaoncoa ttinga; janha jeha ttinga para sinttatján. Co cai janha inchin ná xiboeador que tjacoaha tton ngataonhe čintto. ²⁷ Janha nttaguetan cuerpona tangui co nttaha para que cuerpona sitticaon na janha para que janha sinttatjanha tti janha ditticanho que janha jointtacoán icha chojni.

10

Pablo rinaoha que chojni sinchesayehe na ídolo

¹ Janha rinaho que jaha ra tsonoha ra tti conhe nindogoelitoa na ḵančjen ngatja ntiha are anto osé. Para que jehe na sacjoi na, Dios rroanha ná ttjoi para vitaonhe na ntiha. Co Dios conxiré ndachaon para vehe ná ntiha tti jehe na vattoxin na ndachaon que dindi Mar Rojo. ² Ttjoi jihi co tti conhe ndachaon, jihi ná señal que Dios coinchiehe Moisés para savicao jehe na co rročho que por ixin milagro jihi que Dios chjé Moisés, jehe na joiguitte na ngain. ³ Co cai cain jehe na joine na tti joanjo Dios ⁴ co cain jehe na vihi na tti jinda que vačhjedoxin xo co jinda mé Dios joanjo cai. Co tti xo mé inchin Cristo. ⁵ Co masqui jamé, anto tsje na vitticaonha na Dios, co mexinxin cain nimé ndavintteguenxin na ntiha ngagaha jna.

⁶ Cain jihi conhe inchin ná ejemplo para ixin ján na para que ján na sonaoha na cosa jianha inchin joinao na jehe na. ⁷ Mexinxin jaha ra nchesayeha ra ídolo inchin joinchehe canxion jehe na. Noa na que joinchesayeha na ídolo ixin ndačho tti jitaxin Palabré Dios: “Tti chojni ntiha vintte na joine na co vihi na. Cottimeja vinttengattjen na vinttette na són para joinchesayeha na tti cox-inttachjan de oro.” ⁸ Co ján na chondaha na que rrotsontaonxin na nčí que jeha nčičhiha na inchin vinttenchehe canxion jehe na, co mexinxin vintteguenxin veintitrés mil na ngain nacoa nchanho. ⁹ Ni chondaha na que tsjá na paciencia que chonda Dios inchin joinchehe canxion jehe na, co mexinxin conché joinehe va jehe na co ndavintteguenhe tsje na. ¹⁰ Ni tsoñaoha na ngain Dios inchin joinchehe canxion jehe na, co mex-

inxin Dios rroanha ná ángel de jehe co ndagoen tsje na.

11 Cain jiji conhe nindogoelitoa na xančhen are saho co vetaxin ngain tti jitaxin Palabré Dios inchin ná ejemplo para ixin jána para que jána isonttoha na jamé inchin joinchehe jehe na ixin jána techon na ngain tiempo que ochian ndatsjexin mundo. **12** Mexinxin jaha ra xo tonoha ra que ojian ditticaon ra Jesucristo ttjiho ra cuidado para que sincheha ra jianha. **13** Tti tangui que jaha ra tonha ra xajeho jamé tonhe cainxin chojni cai. Pero jaha ra nchao chonda ra confianza ngain Dios ixin jehe sanjoha icha tangui nganji ra, jeho tti jaha ra nchao tsixinha ra. Ixin are rrochonda ra tangui, Dios sinttanoha ra ngain ansean ra para quexén sinchehe ra para sačhjexin ra de ngain tangui mé. Co jamé tsixinha ra ngain cain cosa tangui.

14 Mexinxin, cain jaha ra hermano, nchesayeha ra ídolo. **15** Janha ndattjo jaha ra jañá ixin jaha ra nchao ttinxin ra, co xaxaon ra jian si jeha ndoa tti janha ndattjo ra. **16** Are dayé na tti vaso de vino ngain Santa Cena co are jána donho na vino mé, jamé nttoho na ixin rročho que jána dotticaon na ixin Jesucristo jehe cointtji jní para ixin jána. Co are jontte na tti niottja que jána tonchjea na, jamé nttoho na ixin rročho que jána dotticaon na ixin Jesucristo jehe joanjo cuerpo para ixin jána. **17** Masqui jána anto tsje na, pero cain na jontte na xajeho niottja mé co jiji rročho ixin cain na nacoaxinxon cuerpo na para ngain Jesucristo.

18 xaxaon ra de ngain chojni Israel; are jehe

na jine na nttao que dehe ngain mesé Dios, tjago na ixin cain jehe na nacoaxinxon cuerpo para ngain Dios. ¹⁹ Ndačhjanha que ixin ídolo techon o chonda joachaxin, ni tti nttao que daquehe chojni ngain jeha icha jian nttao que cain icha nttao. ²⁰ Tti janha ndačhjan rročho que are tti chojni que chonxinha Dios daquehe nttao ngain ídolo, nttao mé para ixin espíritu jianha ixin nttao mé jeha para ixin Dios. Co janha rinaoha que jaha ra sinchesayehe ra espíritu mé. ²¹ Čhoha sixin ra ngain vasoe Jesucristo co sixin ra ngain vasoe espíritu jianha. Čhoha sinttexin ra ngain mesé Jesucristo co sinttexin ra ngain mesé espíritu jianha. ²² ¿Apoco sonao na sonttoñao na Jesucristo? ¿Apoco icha soji jáñ na que jehe?

Tti nchao sinchehe ni co tti sinao chó ni ixin ditticaon ni Cristo

²³ Ján, ndoa tti ndačho na que ná ni nchao sinchehe ni lo que sinao ni, pero cainxinha jian para ixin jehe ni. Ján, ná ni nchao sinchehe ni lo que sinao ni, pero jeha cainxin tti sinchehe ni tsjenguijna ni para sitticaon ni Jesucristo icha. ²⁴ Chonda ni que tsjé ni tti jian para icaxin chojni co jeoha tsjé ni jian para ixin jeho ni.

²⁵ Jaha ra nchao jintte ra cainxin tipo de nttao que tochji ngain ndásin. Jaha ra chondaha ra joažaon de sintte ra quexeho nttao mé co danchianguisha ra si vehe nttao mé ngain ídolo o ni nahi ²⁶ ixin nontte co cain cosa que jí ngataha nontte Dios joinchechjian cain mé co cain mé cosé jehe.

²⁷ O si čhonja chojni que ūxa ditticaonha Jesucristo rrondattjo ra ixin sinttecoho ra, co si jaha

ra sinao ra sinttecoho ra, nchao para jaha ra jintte ra cain tti rrochjá ra na co x̄aonha ra para jintte ra nttao mé. Co x̄onhi danchianguihi ra de ixin ttinó joixin cain nttao mé. ²⁸ Pero si tti chojni que rrochjá ra nttao rrondačho ixin nttao mé vehe nttao ngain ídolo, jaha ra jintteha ra nttao mé para sincheha ra jianha ngain tti chojni que rrondattjo ra jamé, co para que chojni mé tsonoeha feo ngain ansén. ²⁹ Janha rrinichja de ixin quexén tonohe icha chojni, nahi de ixin quexén tonoha jaha ra.

Pero puede čhonja ra sanchianguina ra: “¿Andosenna tti x̄axaon icha chojni?” ³⁰ Ixin puede x̄axaon ra que si danjo ra gracias ngain Dios de ixin tti jintte ra, icha chojni čhoa rronichja na feo de ixin jaha ra. ³¹ Nchao jí si jaha ra jintte ra o dihi ra o nc̄ehehe ra icanxin cosa, pero nc̄ehehe ra cain mé para nchesayexin ra Dios. ³² Nc̄ehehe ra cosa que iná chojni feo tsonohe ngain ansén, ni para chojni judío, ni para chojni que jeha judío, ni para chojni que ditticaon Jesucristo. ³³ De partena janha ttjinha cuidado para que cainxin chojni sinao na tti janha rrinttaha, janha ttjeha jian jeho para ixin janha, janha ttjé para ixin icha chojni para que Jesucristo nchao tsjenguijna jehe na para que rrochondaha na castigo de ixin tti jianha que nc̄ehehe na.

11

¹ Jaha ra rrohe ra ejemplona janha inchin janha rroá ejemplor Jesucristo.

Tti jiquininxin sinchehe nchí ngain servicio

² Janha atto chahna ixin jaha ra cainxin tiempo xaxaon ni ra janha co tenchehe ra sigue tti janha jointtacoanha ra. ³ Pero janha rinaho que tsinxin ra que Cristo, mé tti já de cada xí ixin jehe tti ttetonhe cada xí; co cada xí, mé tti já nčhičhihi ixin jehe xa tti ttetonhe nčhičhihi xa; jañá inchin Dios, mé tti já Jesucristo. ⁴ Si ná xí tsjanotaon já xa are jinchecoanxinho xa Dios are ngain servicio o are jindache xa chojni ngain nihngo tti joajna que jehe xa vayé xa que joixin de ngain Dios, mé rročho ná joasoaxin para ixin Cristo. ⁵ Pero si ná nčhí tsjanotaonha já nčha are jinchecoanxinho nčha Dios are ngain servicio ngain nihngo o are jindache nčha icha chojni tti joajna que jehe nčha vayé nčha que joixin de ngain Dios, rročho ná joasoaxin para ixin xixihi nčha. xajeho inchin jehe nčha rrocjinhi nčha ngoixin já nčha. ⁶ Si ná nčhí tsjanotaonha já nčha, mexinxin icha jian rročinji cainxin xajá nčha. Pero si jaha ra tsonoha ra que atto soaxin para ná nčhí rročinji xajá nčha o rrocjin nčha hasta tti nganito já nčha, mexinxin icha jian chonda nčha que tsjanotaon já nčha. ⁷ Xí chondaha que tsjanotaon já xa ixin Dios joinchechjian jehe xa inchin jehe Dios. Co de ngain xí Dios tosayehe. Co nčhí para sinchesayehe nčha xí. ⁸ Jañá ixin are Dios joinchechjian xí, jehe joinchechjianha xa de ngain ná nčhí, sino que Dios joinchechjian nčhí de ngain xí. ⁹ Nčhí conchjian nčha para ixin xí, co jeha conchjian xí para ixin nčhí. ¹⁰ Mexinxin de cain jihi, nčhí chonda que tsjanotaon já nčha para ná señal que jehe nčha ditticaon nčha xixihi nčha, co para rroché cain

ángel. ¹¹ Pero masqui jamé, para ixin ján na que dotticaon na Jesucristo, xí čohoa sehe xa si coha nčhí, ni nčhí čohoa sehe nčha si coha xí, ¹² ixin ján ndoa que saho nčhí conchjian nčha de ngain ná xí, pero de are mé para ndahi, xí doanxin xa de ngain nčhí, co cayoi mé ttixin de ngain Dios.

¹³ Jaha ra mismo ndačho ra si nchao jí que nčhí are sinchecoanxinho nčha Dios tsjanotaonha já nčha. ¹⁴ ¿Apoco noeha cain chojni que ná joasoaxin para ixin xí rrochonda xa xajá xa yeye? ¹⁵ Pero para ixin nčhí ná cosa jian para ixin jehe nčha rrochonda nčha xajá nčha yeye ixin vayé nčha xajá nčha yeye para rročanotaon já nčha. ¹⁶ Pero si čonja chojni rinao tsoñao de ixin asunto jihi, pero chojni mé chonda que tsonohe que ni ján na co ni icha chojni que ditticaon na Dios chonxinha na iná costumbre.

Tti joinchehe chojni ngain Santa Cena

¹⁷ Janha xaxanho rrondattjo ra canxion cosa que janha nchešoxinnaha. Ndachjenji na chojni que are xatte ra para ngain servicio, parece que chojni ngain ningoa ra nchehe na jianha en vez de jian. ¹⁸ Ixin janha ndachjenji na na que are xatte ra para nchesayehe ra Dios ngain servicio, are mé nichja ra ixin rrochjeya ra, co janha dit-ticanho nchion que puede ndoa jamé nchehe ra. ¹⁹ Pues, ipuede jaha ra xaxaon ra que chonda que rrochjeya ra en grupos para que tsonohe ni quex-ehe ra xo ndoa ditticaon ra Jesucristo! ²⁰ Mexinxin tti cena que jaha ra jintte ra ngain nihngo, mé ijeha Cena de Jesucristo ixin jaha ra jañá xaxaon ra. ²¹ Co ixin are hora que jaha ra jintte ra cena

mé, cada ra choenha chó ra; saditaon ra nttiha para ditse ra cená ra jaho ra. Mexinxin ttoha ra anto jintte ra co dihi ra hasta dinttecoan ra. Co ittoha ra denhe ra jintta. ²² Co jañá tenchexin ra jianha ngain chojní Jesucristo co nchecosoehe ra tti chojni noa que dicaoha tti jine. ¿Achondaha ra nchiandoi ra tti sinttexin ra co tti sixin ra? ¿Quexén rročhjan de ixin jaha ra? ¿Arronichja čhjoin de ixin jaha ra? ¡Nahi de ixin tti tenchehe ra jihí!

Cena de Jesucristo

(Mt. 26.26-29; Mr. 14.22-25; Lc. 22.14-20)

²³ Janha de ngain Jesucristo mismo vayaxin tti janha jointtacoanha jaha ra: Que ngain tti ttie que Judas cjoago Jesús para ngain tti chojni que ningaconhe jehe, Jesús de rá tsexin niottja ²⁴ co are joexin joanjo gracias ngain Dios, jehe cončinji nio co ndačho: “Jintte ra. Jihí jehe cuerpona que janha sanjo para tsjenguijnanxin jaha ra. Janhi ncuhehe ra para rročhaxaonxin ni ra janha.” ²⁵ Jamé cai, are joexin cena, jehe de rá tsexin tti vaso que jiria vino co ndačho: “Vino jihí rročho tti nuevo trato que nchesegurá conixin jnina. Cada nttiha que jaha ra sihi ra, ncuhehe ra para rročhaxaonxin ni ra janha.” ²⁶ Mexinxin cada nttiha que jaha ra sintte ra niottja co sihi ra vino para ngain Santa Cena, jaha ra ncuhehe ra jañá ixin Jesucristo ndavenhe para ixin jaha ra. Co ncuhehe ra jihí hasta que jehe tsí iná.

Quexén sine chojni tti Santa Cena

²⁷ Jañá, quexeho chojni que jine niottja co dihi de ngain vasoe Jesucristo co si jehe chojni mé ncuheha inchin jiquininxin, jehe nchesayeha Dios,

co chojni mé nchehe jianha ixin dicaoha respeto ngain cuerpoe Jesucristo co ngain jní Jesucristo.

²⁸ Mexinxin ante de sintte ra tti niottja co sihi ra de tti ngain vaso que Jesucristo coetonha, cada jaha ra ḫaxaon ra jian quexén sinchehe ra para sintte ra Cena mé inchin jiquinixin ²⁹ ixin si jintte ra co dihi ra co ḫaxaonha ra que ixin mé rročho cuerpoe Jesucristo, pero jeho tettjé ra castigo para ixin jaha ra. ³⁰ Mexinxin anto tsje de jaha ra teniha ra co tsangaha ra, co icaxin chojni de jaha ra hasta ondavenhe na. ³¹ Pero si ján na rrocjinho na cuidado jian jaon na ante de rrojontte na Cena jihi, Jesucristo rrochondaha que rrochjá na castigo jihi. ³² Pero are Jesucristo jehe dicon que ján na nchaoha tenttoho na, jehe nttacastigá na nchion jai para que ján na ttentoxinhi na vidá na, co jamé ján na tsjinha na ngain infierno tti tsji cain chojni que ditticaonha Jesucristo.

³³ Jañá mexinxin are rročatte ra para sintte ra Cena jihi, chonhe chó ra naná ra para nataonxin sintte ra cain ra. ³⁴ Si chonja chojni senhe jintta, icha jian si jehe sine ngain nchiandoha para que jehe sitaonha nttiha co sine icha que cainxin chojni are sine na ngain Cena mé, co jamé Dios rrochjeha chojni mé castigo. Co tti icha asunto janha rrondattjo ra are saso para sasotsjaha ra.

12

Tti joachaxin que danjo Espíritu Santo ngain cada chojni

¹ Hermanos, jí icanxin cosa que janha rinaho tsonoha ra de ixin joachaxin que danjo Espíritu Santo ngain cada chojni.

² Jaha ra noha ra jian que are ḥa vaguitti-caonha ra Jesucristo, jaha ra vaguittoaxin ra de vanchesayehe ra canxion ídolo que ̄choha nichja. ³ Mexinxin jai janha rinaho tsonoha ra que cain chojni que jí Espíritu Santo ngain ̄choha rrondačho: “¡Jesús jianha!” Co cain chojni que rrondačho: “¡Jesús tti chonda cain joachaxin!” pero ixin Espíritu Santo jí ngain chojni mé.

⁴ Dios chjá na tsje clase de joachaxin, pero jeho ngain Espíritu Santo ttixin cain joachaxin mé. ⁵ Jí tsje clase de ḥa que sonttoho na, pero cain ḥa mé ḥajeho ḥa para ixin Jesucristo. ⁶ Jí tsje manera que nttoho na ḥa mé, pero jeho nacoaxinxon Dios tti ttjenguijna cain chojni para nchehe na ḥa mé. ⁷ Dios tjago ixin cada na chonda na Espíritu Santo nganji na ixin jehe mé tti chjá na joachaxin cada na. Co joachaxin mé tti ttjenguijna na jána para que jána nchao tsjenguijna na icha chojni que ditticaon Jesús. ⁸ De ixin Espíritu Santo Dios danjo joachaxin ngain canxion chojni para nichja na jian inchin anto ttinxin na. Co icanxin na ḥajeho Espíritu Santo tti danjo joachaxin para ndačho na ngain icha chojni tti Dios joinchenohe na. ⁹ Canxion na dayé na joachaxin de ixin jehe Espíritu mé para ditticaon na jian. Co icanxin na dayé na joachaxin para nchexingamehe na chojni nihi. ¹⁰ Icanxin na dayé na joachaxin de nchehe na milagro. Co icanxin na dayé na joachaxin para ndache na chojni joajné Dios que jehe na dayé

na. Co icanxin na Espíritu Santo chjé na joachaxin para datsoan na tti chojni que jí espíritu jianha ngain co tti chojni que jí Espíritu ndoa ngain. Co icanxin na dayé na joachaxin de nchao nichja neje na palabra que ni jehe na ttinxinha na. Co icanxin na dayé na joachaxin para ndačho na ixin quehe rročho palabra mé. ¹¹ Pero cainxin cosa jihí ncchehe jeho tti nacoaxinxon Espíritu Santo, mé tti tonchjea ojejé joachaxin ngain cada chojni inchin rinao jehe Espíritu Santo.

Cain na tequininxin na ngain nacoaxinxon cuerpo

¹² Inchin cuerpo ni chonda tsje parte, pero masqui tsje parte rročho nacoa cuerpo, jamé ján na cai ngain Jesucristo; masqui tsje na, pero tonchjian na nacoa cuerpo para ixin jehe. ¹³ Cada na ján na ná parte de cuerpo Cristo masqui judío na o griego na, o dicochji na ngain ḫa o ni nahi. Pero Espíritu Santo joinchechjian cain na nacoa cuerpo are joiguitte na. Co mexinxin ján na parte de cuerpo Cristo, co cain na vayé na Espíritu Santo.

¹⁴ Ná cuerpo tonchjianha nacoa parte, sino de tsje parte. ¹⁵ Si rotté ni rrondačho: “Janha jeha rá na, mexinxin janha jeha ná parte de cuerpo jihí”, ¿apoco por ixin jamé rotté ni ijeha ná parte de cuerpo ni? ¹⁶ O si ndatsjoen ni rrondačho: “Janha jeha jmacon na, mexinxin janha jeha ná parte de cuerpo jihí”, cai ¿apoco por ixin jamé ndatsjoen ni ijeha ná parte de cuerpo ni? ¹⁷ Si ngoixin cuerpo ni rrocji joxon jmacon ni, ¿quexén nchao rroquini ni? O si ngoixin cuerpo ni rrocji

joxon ndatsjoen ni, ¿queξén nchao rrocoξajnihi ni ná cosa? ¹⁸ Pero Dios coín cada parte de cuerpoe ni ngain lugar tti jehe joinao. ¹⁹ Si cain rrocji nacoa parte, ¿queξén rroguehe cuerpoe ni? ²⁰ Masqui jí tsje parte, tonchjian jeho nacoaxinxon cuerpo.

²¹ Jmacon ni čohoa rrondačho ngain rá ni: “Jaha rrogondanaha”; ni cai já ni čohoa rrondačho ngain rotté ni: “Jaha rrogondanaha.” ²² Jeha jamé ixin tti cain parte de ngain cuerpoe ni que jehe ni tonohe ni dondaha ngain cuerpo, pero cain parte mé tti icha donda ngain cuerpoe ni. ²³ Co tti ngain parte de cuerpoe ni tti antoha rinao ni, cai ḥanotaon. Co tti ngain parte de cuerpoe ni que čohoa ḥago, co mé tti icha dicao ni cuidado para ḥanotaon jian, ²⁴ co nc̄heha ni ngain parte que nchao ḥago. Jamé Dios joinchechjian cuerpoe ni para que cain parte que icha rinaoha ni, mé tti icha tosayehe, ²⁵ para que ḥonhi parte tsoñaohe iná parte, sino que cada parte de cuerpo rroξaxaon de ixin icha parte de ḥajeho cuerpo. ²⁶ Si ná parte de cuerpoe ni ttín, cai icha parte de cuerpoe ni tonohe feo. Co si ná parte de cuerpoe ni čhjoin tonohe, cai tti icha parte de cuerpoe ni čhjoin tonohe.

²⁷ Tti janha rrindačjan rročho que cain jaha ra tonchjian ra nacoa cuerpoe Cristo, co cada ra tonchjian ra naná parte de cuerpo mé. ²⁸ Jamé Dios chjé cargo jian canxion chojni que te ngain nihngo. Co saho parte para ixin tti chojni que te representanté Jesucristo, yoxin parte para ixin tti chojni que ndačho tti joajna que jehe dayé de ngain Dios, ninxin parte para tti chojni que

nchecoenhe icha chojni de ixin Dios, cottimeja para ixin tti chojni que nchehe milagro, para ixin tti chojni que nchexingamehe chojni nihi, para ixin tti chojni que nchao ttjenguijna icha chojni, co para ixin tti chojni que nchao tjagohe icha chojni para nchao nchehe na ḫa unido, co para ixin tti chojni que nichja neje palabra que ni jehe čohoa ttinxin.²⁹ ¿Apoco cain na joxon representanté Jesucristo na? O ¿apoco cain na dayé na joajné Dios? ¿Apoco cain na nttocoenhe na chojni de ixin Dios? O ¿apoco cain na nttoho na milagro?³⁰ O ¿apoco cain na chonda na joachaxin de nttoxingamehe na chojni nihi? ¿Apoco cain na nchao ndačho neje na palabra que ján na ttinxinha na? ¿Apoco cain na nchao ndache na icha chojni quehe rročho palabra mé? Claro que nahi.³¹ Jaha ra nchehe ra de que sayehe ra de ngain Dios cain tti joachaxin icha jian. Pero janha tsjagoha ra iná cosa icha jian.

13

Quehe rročho tti rinao chó chojni

¹ Si janha nchao nichja cainxin nguigoehe chojni ngataha nontte co hasta nguigoehe cain ángel, pero si janha rinaoha cain chojni, janha ḫonhi rentte na masqui rrinichja, ixin mé inchin ná niroa que torancjan o inchin ná chia que nchechjian joxon ruido. ² Si janha ndačhjan tti joajna que janha dayá de ngain Dios, co si janha chonxin cainxin cosa que siconhe, co si janha nona canchesinxon cosa, co si janha anto jian ditticanho Cristo hasta nchao ttetoan jna para sat-sjixin jna de ngain lugar que te jna, si janha nchao

nttaha cain mé, pero si janha rinaoha cain chojni, janha xonhi rentte na. ³ Si janha tsonchjeyá chojni noa cainxin cosa que janha chonda ntihi ngataha nontte, co si janha sanjo hasta cuerpona para rroche ixin janha nichja joajné Jesucristo, pero si janha rinaoha cain chojni, xonhi xé cain tti janha jointtaha.

⁴ Tti chojni que rinao cain chojni chonda paciencia co nchehe cosa jian ngain icha chojni. Chojni mé jeha chjoehe, ni jeha puro nichja de ixin jehe mismo, ni jeha orgulloso. ⁵ Chojni mé jeha grosero ni ttjeha cosa jian para ixin jeho. Chojni mé toñaoha ni ttencjianha coraje. ⁶ Chojni mé cheha de ixin tti jianha que nchehe icha chojni, jehe ché ngain tti ndoa. ⁷ Cainxin ttixinhi chojni mé de ngain icha chojni ixin jehe na cain tiempo xaxaon na jian de ixin cain chojni mé, co jehe na chonhe na para que chojni mé tsentoxinhi na vidé na ixin nchaoha tenchehe na, co chonda na paciencia para cain chojni mé.

⁸ Ján na chonda na que sonao na cain chojni para cainxin tiempo. Tsí tiempo que tti chojni que nichja joajné Dios que jehe dayé irrochondaha na que rronichja na, ni irronichjaha neje na tti palabra que ni jehe na ttinxinha na. Co ngain tiempo mé isondeha na que Dios sinchenohe na. ⁹ Jai ján na chonda na joachaxin para rrochonxin na, pero jeho nchion, co chojni jai tsjeha joajné Dios dayé. ¹⁰ Pero are tsí Jesucristo, cottimeja tti nchion que ján na chonxin na ndatsjexin ixin Dios sinttanoa na cain.

¹¹ Are janha xá nchín joarihi, janha vanichja co važaxanho co vaquianxin inchin ná chjan.

Pero are janha ocjoi ná xí, cointtoa cain cosa que važaxanho are nchín na. ¹² xajeho jamé jai docon na cain cosé Dios inchin ngacjan ranontte, o inchin are čohoa doconxin na con na ngain ná espejo que xonhi xé. Pero cottimeja jána socon na cain cosa claro. Jai janha chonxin jeho nchion, pero cottimeja janha rrochonxin cainxin inchin Dios chonxin na janha. ¹³ Jamé, jí ní cosa que jána chonda na que sotticaon na Jesucristo, co chonda na que sotticaon na ixin seguro tsonhe cain tti ndačho Dios, co chonda na que sonao na cain chojni. Pero de canio cosa jihi jeho nacoa tti icha importante; jeho tti sonao na cain chojni.

14

*Pablo ndačho ixin quehe rročho tti nichja neje ni
palabra que jehe ni ttinxinha ni*

¹ Nchehe ra que rinao ra cain chojni, co xajeho tiempo danchia ra que Dios rrochjá ra cain clase de joachaxin, pero icha danchia ra tti joachaxin de rrondache ra chojni tti joajna que dayé ni que ttixin de ngain Dios. ² Tti chojni que nichja neje tti palabra que ni jehe ttinxinha, chojni mé nichja ngain Dios co jeha ngain chojni ixin xonhi chojni ttinxin tti jinichja chojni mé. Espíritu Santo tti nchenichja chojni mé, pero jehe nichja cosa jima que xonhi chojni ttinxin. ³ Co tti chojni que nichja tti joajna que jehe dayé que ttixin ngain Dios, jehe nichja ngain icha chojni para icha sitticaon na Jesucristo co para sincheinamá na co para que xonhi joachjaon tsa ansén na.

⁴ Tti chojni que nichja neje tti palabra que ni jehe ttinxinha, jamé jehe mismo icha ditticaon Jesucristo. Pero tti chojni que nichja tti joajna que jehe dayé que ttixin de ngain Dios, chojni mé icha ncheguitticaon cain chojni que ttinhi.

⁵ Janha rrojinaho que cain jaha ra rrochonda ra joachaxin de rronichja neje ra tti palabra que ni jaha ra ttinxinha ra. Pero are xatte ra ngain servicioa ra, janha icha rinaho que jaha ra rronichja ra tti joajna que dayehe ra que ttixin de ngain Dios. Ixin jamé icha tsjenguijna ra cain chojni, co rronichjaha ra tti palabra que xonhi chojni ttinxin. Pero si ná ra chonda ra joachaxin para rrondache ra chojni quehe rročho palabra mé, nchao para rronichja ra palabra mé ixin cai mé tsjenguijna cain jaha ra. ⁶ Mexinxin si janha saso para sasotsjaha ra co rronichjaxin ra tti palabra que ni janha tsianxinha, xonhi xé para ixin jaha ra tti janha rronichja. Pero si janha rrondattjo ra claro tti ndachjenji na Dios, o sinttacoanha ra tti ndoa de ixin Dios, cottimeja jáñ, janha rrochjaha ra tti rrogondaha ra co tti ndoa sondaha ra.

⁷ Tsín na de ejemplo cosa que nczechjian són tti chondaha vida inchin ná flauta o ná arpa. Si chojni noeha danoa o dinga cosa mé, choha satsoan ni quehe són jinchechjian. ⁸ Co iná ejemplo de ngain guerra. Si clarín sanoaha xa claro ixin tseto xa, xonhi soldado rročaxaon ixin tseto. ⁹ xajeho jamé tonhe nganji jaha ra cai: si neje ra ndačhoha palabra que nchao tsinxin ni, xonhi chojni tsinxin quehe tendačho ra. ¹⁰ Ján, ndoa que jí tsje idioma ngoixin mundo, co palabré cada idioma mé

chonda sentido. ¹¹ Pero si janha ttianxinha tti idioma que rronichjananxin icaxin chojni, janha inchin chojni de iná nación para ngain chojni mé, co cai jehe na inchin chojni de iná nación para nganji na janha. ¹² Mexinxin jaha ra que anto rimao ra sayehe ra joachaxin que ttixin de ngain Espíritu Santo, pero de cain yá, icha ncuhehe ra que dayehe ra tti joachaxin que tsjenguijna cain chojni que ditticaon Jesucristo.

¹³ Jamé cai, tti chojni que chonda joachaxin de nichja neje palabra que jehe ttinxinha, cai chonda que sanchia joachaxin ngain Dios para que Dios rrochjé jehe joachaxin de nchao tsinxin para rrondache icha chojni quehe rročho palabra mé. ¹⁴ Si janha sinttacoanxian Dios conixin tti palabra que janha ttianxinha, jáñ, ndoa que janha rrinichja conixin espirituna, pero ngain joarrixonna rrittianxinha quehe rročho tti janha rrinichja. ¹⁵ ¿Quehe sinttaha janha remé? Chonda que jí tiempo que janha rronichja ngain Dios conixin espirituna pero cai chonda que jí tiempo que janha rronichja ngain Dios conixin joarrixonna. Chonda que sinttacoanxin himno conixin espirituna, pero cai sinttacoanxin conixin joarrixonna. ¹⁶ Ixin si ná chojni jinchecoanxinihi Dios jeho de ngain espiritu, masqui icha chojni tettinhi tti jehe jindačho, pero jehe na ttinxinha na tti jehe jindačho co mexinxin čoha rronichja na ngain Dios junto conixin jehe ixin jehe na ttinxinha na palabra mé. ¹⁷ Masqui tti jehe ni nichja ni ngain Dios atto nchao jí, pero para icha chojni, nahi, ixin ttinxinha na tti jehe ni nichja ni. ¹⁸ Janha chjaha gracias ngain Dios ixin janha

nichja neje palabra que janha ttianxinha icha tsje nttiha que cain jaha ra,¹⁹ pero are ngain servicio, icha jian si janha nichja jeho nahoh palabra que chojni nchao tsinxin na, que rronichja dies mil palabra que xonhi chojni ttinxin.

²⁰ Hermanos, janha rinaho que rroñaxaonha ra inchin chjan de cain cosa jihi. Ján, dintte ra inchin chjan que chonxinha cosa jianha, pero dintte ra inchin chojni yeje para xaxaon ra jian ngain cosa de Dios. ²¹ Ndačho ngain tti libro que jitaxin Palabré Dios: “Janha rronichjá nación mé ngain ojé nguigoa co de ixin tti chojni que tsixin de ngain ojé nontte, pero masqui jamé, xa sincheha na na caso, jañá cho Dios.” ²² Jamé que tti joachaxin de rronichja neje ni palabra que ni jehe ni tsinxinha ni, mé sirve para ná señal para ixin tti chojni que ditticaonha Jesucristo, co jeha para ixin tti chojni que ditticaon Jesucristo. Pero tti joachaxin de rrondache ni chojni tti joajné Dios que jehe ni dayé ni, mé sirve de señal para ixin tti chojni que ditticaon Jesucristo, co jeha para ixin tti chojni que ditticaonha Jesucristo. ²³ Mexinxin are ná chojni que ditticaonha Jesucristo o chonxinha quehe rroñcho cain jihi siji ngain nihngo co tsinhi que jaha ra tenichja ra palabra que ni jaha ra ttinxinha ra, chojni mé daca rroñaxaon que jaha ra ndadinttexenga ra. ²⁴ Pero si ngain nihngo jaha ra tendačho ra tti joajna que ttixin de ngain Dios que dayehe ra co rato mé sixinhi chojni que ditticaonha Jesucristo o tti chojni que xa ttinxinha jian de ixin Cristo, chojni mé sitticaon co satsoan ixin joinchehe jianha. Jehe jamé tsonohe are

tsinhi tti jaha ra tendačho ra. ²⁵ Jamé cain tti jí ngain ansén chojni mé tononxin, co jehe settoxin nttajochjihí para sinchesayehe Dios co rrondačho que ndoa jí Dios ngayaha ra.

Nchehe ra cain cosa inchin ditonha ra co inchin jiquininxin

²⁶ Mexinxin, hermanos, are rrožatte ra para sinchecoanxinho ra Dios, canxion ra rrotsje ra salmo, co icaxin ra sinchecoenhe ra chojni cosa de Dios, co icaxin ra rrondačho ra cosa que Dios jointtanoha ra, co icaxin ra rronichja neje ra palabra que ni jaha ra ttinxinha ra, co icaxin ra rrondačho ra ixin quehe rročho tti palabra mé. Pero janha rinaho que cain mé tsjenguijna chojni que ditticaon Jesucristo. ²⁷ Are rronichja neje ra palabra que ni jaha ra ttinxinha ra pero are mé rronichja jeho yoto ra, o hasta ní ra co rronichja ra naná ra co naná ra. Co ttoha de jaha ra chonda ra que rrondačho ra quehe rročho tti nichja compañeroa ra. ²⁸ Pero si xonhi chojni nchao rrondačho ixin quehe rročho tti palabra que rronichja ra, icha jian xonhi palabra mé rronichja ra ngain servicio, sino que cada ra rronichja ra jion ngain Dios para que xonhi chojni sinchetjanji ra. ²⁹ Jamé cai si para rronichja ra tti joajna que jaha ra dayehe ra que ttixin de ngain Dios, rronichja jeho yó o ní chojni, co icha ra tsinhi ra co rrondačho ra si ndoa joajna mé joixin de ngain Dios. ³⁰ Pero si rato mé Dios sinchenohe chonja cosa iná chojni que te ntiha, tti chojni que jinichja rato mé chonda que sattechoha tiempo para que rroxeha tiempo para ixin

rronichja iná chojni. ³¹ Jañá cain ra xo sayehe ra joajné Dios, saho rronichja ná ra cottimeja iná ra para que icha chojni tsangui co soan na animado. ³² Tti chojni que nichja tti joajna que jehe dayé que ttixin de ngain Dios chonda joachaxin para rrochonhe tsjexin rronichja ná na cottimeja jehe ³³ ixin Dios jehe ncheñoxinha chojni que ttencjiana respeto.

Jaha ra nchehe ra jian inchin nchehe chojni ngain icha nihngo. ³⁴ Ixin ngain ningoe Jesucristo, mé nchí chondaha nčha que rronichja nčha are ngain servicio ngain nihngo ixin jiquininxinha. Ixin chondaha nchí joachaxin para que jehe nčha tsetonha nčha ngain nihngo ixin jamé jitaxin ngain ley de Dios. ³⁵ Si jehe nčha rinao nčha tsonohe nčha ná cosa, chonda nčha que sanchanguíi nčha xixihi nčha are ongain nchiandoha na ixin čhoinha dicon ni que ná nchí rronichja nčha are ngain servicio.

³⁶ Chonda que xaxaon ra que jeha jaha ra tti chojni que saho conohe palabré Dios, ni jeoha jaha ra tti chojni que vayé palabré Dios, mexinxin čhoa tti rrondačho jaha ra sinchehe icha chojni ngain nihngo. ³⁷ Si ttoha de jaha ra datsoan ra que chonda ra joachaxin para nichja ra joajna que dayehe ra que ttixin de ngain Dios o que chonda ra quexeho joachaxin de Espíritu Santo, pero chonda que satsoan ra que tti janha rricjinha ra Dios coetonna. ³⁸ Pero si chojni que rronichja joajna mé ncheha caso jiji, cai jaha ra ncheha ra caso tti rrondačho chojni mé.

³⁹ Jañá, hermanos, nchehe ra de que Dios

rrochjá ra joajné para nchao rrondache ra icha chojni, co cayacoenha ra tti chojni que rronichja neje palabra que ni jehe tsinxinha. ⁴⁰ Pero nchehe ra cain jiji inchin jiquinixin conixin respeto.

15

Pablo ndačho quehe rročho ixin Cristo xechon

¹ Janché, janha rinaho que rročxaon ra tti jian joajna que janha ndattjo ra. Joajna jiji tti jaha ra vitticaon ra, co tti jaha ra ditticaon ra hasta jai. ² Cai de ixin joajna jiji jaha ra chonda ra iná vida naroaxin que xonhi tiempo tsjexin si jaha ra sinchehe ra sigue tti jaha ra ditticaon ra, si vitticaon ra ndoa.

³ Saho, janha jointtacoanha ra tti janha vayá. Janha ndattjo ra que ixin Cristo venhe para cjoenga hna de ixin cain tti jianha que nttoho na inchin ndačho ngain libro que jitaxin Palabré Dios. ⁴ Co janha ndattjo ra que cjoavá na Jesús co ninxin nchanho jehe xechon inchin jitaxin ngain Palabré Dios cai. ⁵ Co janha ndattjo ra que ixin jehe saho xago ngain Pedro, cottimeja ngain tti icha nirepresentanté jehe. ⁶ Co después ngain nacoa tiempo jehe xago ngain icha de naho ciento chojni que vitticaon jehe. Co tsje de chojni mé xá techon na jai, masqui ttoha na ondavenhe na. ⁷ Después, jehe xago ngain Jacobo, cottimeja ngain cain nirepresentanté jehe.

⁸ Co después de cainxin mé, xago nganji na janha cai masqui are mé janha joarihi inchin ná chjan que toncjihi xan are janné xan xaxaonha jan ixin tsoncjihi chjan mé. ⁹ Janha tti icha

jeha importante na de cainxin nirepresentanté Jesucristo co ninchin jiquininxinha na para sinhi na representanté jehe ixin janha feo vanttaha ngain chojni que vitticaon jehe. ¹⁰ Pero jai janha ndoa representanté Jesucristo na ixin Dios jian nganji janha, co tti jehe joinchehe nganji janha jeha jamaoncoa ixin janha jointtaha ḫa icha que cain icha nirepresentanté Jesucristo masqui jeha janha tti jointtaha, Dios tti joinchehe de ixin janha. ¹¹ Pero ndosennaha si janha tti icha jointtaha ḫa o jehe na, pero jihí tti joajna que janha na vayá na, co joajna jihí tti vitticaon ra jaha ra.

Queherročho ttirroxechonchojní que ndadenhe

¹² Tti joajna que janha na ndattjo ra ndačho que Cristo xechon, mexinxin ¿quedonda ttoha de jaha ra ndačho ra que ixin tti chojni que ndadenhe irrocjanha na rroxechon na? ¹³ Si chojni que ndadenhe irroxechonha na, mexinxin ni Cristo xechonha. ¹⁴ Co si Cristo xechonha, rročho ḫonhi ḫé tti joajna que janha na ndattjo ra remé. Co tti jaha ra ditticaon ra de ixin Jesucristo ḫonhi ḫé cai remé. ¹⁵ Si jamé, janha na rročho chojni que nichja ndoaha de ixin Dios ixin ondačhjan na que Dios joinchexechon Cristo are ndavenhe. Pero si jeha ndoa que ixin chojni que ndadenhe xechon na, mexinxin jeha ndoa que Dios joinchexechon Cristo are ndavenhe ¹⁶ ixin si nindadenhe ixechonha na, mexinxin cai Cristo xechonha are ndavenhe. ¹⁷ Co si Cristo xechonha are ndavenhe, tti jaha ra ditticaon ra de ixin jehe nažoinxon ḫé, co jaha ra ḫa teca ra cain cosa jianha que ncuhehe ra. ¹⁸ Co si jamé, cai cain chojni que vitticaon Cristo co ndavintteguenhe na ndavitján almé na.

19 Si ján na dotticaon na que Cristo jeho jian para ngain vida jihi, ján na tti chojni que icha feo tsonohe de cain chojni.

20 Pero tti mero ndoa que ján, Cristo xechon are ndavenhe. Jehe tti saho xechon para que cain chojni que ndadenhe chonda que rroxechon na. **21** Ixin Adán vitticaonha Dios, cainxin chojni ngoixin mundo tequininxin ndasenhe na. Co ixin Jesucristo xechon are ndavenhe, jamé cai cain chojní jehe chonda que rroxechon na después de ndadenhe na. **22** Jamé inchin cain na ndadenhe na ixin ján na razé Adán na, cai cain na rroxechon na co rrochonda na iná vida naroaxin ixin ján na chojní Cristo na. **23** Pero cada na inchin tequininxin na: Cristo tti saho xechon are ndavenhe. Cottimeja are Cristo tsí iná, cain chojní jehe rroxechon na. **24** Cottimeja Cristo sinchexantte cainxin joachaxin que jí nttihi ngataha nontte co ngajni co sinchegayé joachaxin mé ngain Dios Ndodá na **25** ixin Cristo chonda que tsetonha hasta tsjeja cainxin chojni que ningaconhe jehe. **26** Co tti última cosa que jehe ningaconhe, tti ndadenhe ni, cai mé chonda que rroxantte co ndasitján. **27** Ixin Dios joanjo joachaxin ngain Cristo para que jehe ttetonhe cain cosa, pero are ndačho ngain Palabré Dios que Cristo ttetonhe cain cosa, mé rročhoha ixin ttetonha ngain Dios ixin Dios tti joanjo joachaxin ngain Cristo para que jehe ttetonha. **28** Co are Cristo osacha de ngain cain tti ningaconhe, cottimeja jehe Cristo tti Xenhe Dios, rrocjan sanjo joachaxin que jehe vayé de ngain Dios para que jeho Dios tti tsetonha cain cosa. Ixin Dios tti joanjo joachaxin para que Cristo sacha.

29 Si chojni que ndadenhe irroxechonha na ¿quedonda jí chojni que diguitte na en lugar de tti chojni que ndadenhe? ¿Quedonda nchehe na jañá si jehe na ditticaonha na que tsí nchanho que cain tti ndadenhe rroxechon?

30 ¿Co quedonda cain tiempo ján na techonda na peligro? **31** Cain nchanho janha chonda peligro de ndasenhe na ixin nichja de ixin Jesucristo. Co jamé ndoa tti janha tonna, pero cai čhjoin tonona janha ixin jaha ra ditticaon ra Jesucristo, tti chonda cain joachaxin para ixin jána. **32** Janha jointtadiscutí xí čhintto ngain ciudad de Efeso de ixin jehe palabré Dios, pero si rrocji ndoa que chojni que ndadenhe irroxechonha na, janha irrochondaha que rrondačjan palabra mé co rrochonda razón tti chojni que ndačho: “Sontte na co sonho na ixin ndoe o rejngui ondasenhe na.”

33 Dittoaxinha ra sinttayaha ra na. Ndoa inchin ndačho dicho: “Chojni jianha nchetján chojni jian.” **34** Jaha ra dintte ra ngain ná vida jian co nao; ncheha ra cosa jianha. Janha ndattjo ra jihí ixin nona que ttoha de jaha ra xá ditticaonha ra Dios. Janha ndattjo ra jañá para que rrochonxin ra joasoaxin.

Quexén rroxechon chojni que ndadenhe

35 Pero puede čhonja chojni sanchiangui: “¿Quexén rroxechon chojni que ndadenhe? ¿Quehe clase de cuerpo rrochonda na?” **36** Co mé ná pregunta que xonhi xé. Inchin are dinga ná semilla, semilla mé chonda que ndadenhe para que čhindi ca. **37** Tti dinga jeha ca ixin jeha ca tti čhintaon, jeho grano que dinga, mé tti čhintaon,

sea trigo o iná semilla. ³⁸ Cottimeja Dios chjé semilla mé forma que jehe rinao co cada semilla dayé cuerpoe inchin tequininxin. ³⁹ Jeha cainxin cuerpo xajeho. Cuerpoe chojni ojé clase, co cuerpoe coxigo ojé clase, cuerpoe conttoa iná clase, co cuerpoe copescado ojé clase. ⁴⁰ Jamé cai cuerpoe ángel ngajni ná clase co cuerpoe chojni ngataha nontte iná clase. Pero cuerpoe ángel chonda ná manera de chjoin te co cuerpoe chojni chonda ojé manera de chjoin te. ⁴¹ Tté nchanho icha jé que tté conittjao, co cai icha jé tté conotse, co de cain conotse cai ojejé tté va. ⁴² Jamé tsonhe cai ngain tti rroxechon chojni que ndadenhe. Jehe xavá ná cuerpo que rrenga, co rroxechon iná cuerpo que isenha. ⁴³ Tti cuerpo que chonda na jai chjoinha te ixin tonihi co ndadenhe, pero cuerpo que rroxechon anto chjoin sehe ixin itsoniha co ni isenha. Cuerpo que chonda na jai tsangaha, pero cuerpo que rroxechon jehe soji. ⁴⁴ Are ndadenhe ni, xavá jeho cuerpo que jehe ni dayé ni de ngataha nontte, pero are rroxechon ni, sayé ni cuerpo de ngain Dios. Jí cuerpo de ngataha nontte, co cai jí cuerpo de ngajni.

⁴⁵ Ndačho ngain tti jitaxin Palabré Dios: “Tti saho xí cjoí Adán co jehe vehe tti saho chojni que vechonda vida”, pero ján na ndačho na ixin Cristo tti último Adán ixin jehe chonda espíritu que danjo vida. ⁴⁶ Pero jai ján na chondaha na cuerpo de ngajni; jai ján na chonda na cuerpo de ngataha nontte. Cottimeja rrochonda na cuerpo de ngajni. ⁴⁷ Tti saho xí conchjian xa de jinche, co jehe xa de ngataha nontte xa. Co Jesucristo inchin

tti yoxin xí, pero jehe joixin de ngajni. ⁴⁸ Cada chojni chonda naná cuerpo inchin cuerpo que vechonda Adán que conchjian de jinche. Pero tti chojni que ditticaon ngain Jesucristo, chojni mé tsí nchanho que rrochonda na cuerpo inchin cuerpo que chonda Jesucristo ngajni. ⁴⁹ xajeho jai jána chonda na ná cuerpo inchin cuerpo Adán, pero tsí nchanho que jána rrochonda na cuerpo inchin cuerpo Jesucristo.

⁵⁰ Janha rrindattjo ra que cuerpo de nttao contaloro čoha sehe ngain lugar tti jittetonha Dios, ixin tti seha tončhenhe čoha sehe ngain tti tončhenhe para cainxin tiempo. ⁵¹ Pero janha rinaho que jaha ra tsonoha ra ná cosa que xa noaha ra: Jeha cainxin na senhe na, pero jána, cainxin na sayé na ojé cuerpo. ⁵² Jihitsonhe anto daca inchin are ttejé co dantjé con ni; tsonhe are tsinhi ni tti último tsoyao trompeta. Are mé Cainchojni que vitticaon palabré Jesús co ondavenhe na, jehe na rroxechon na conixin iná cuerpo co ixonhi tiempo senhe na. Co xo xa sonttechon na are mé anto daca sitoxin cuerpoa na cai ⁵³ ixin cuerpoa na jai tončhenha sé; co chonda que sitoxin para que nchao tsončhenhe conixin tti tončhenhe para cainxin tiempo. ⁵⁴ Co are tsonhe jamé, cottimeja yá joiconhe tti ndačho ngain tti jitaxin Palabré Dios: “Tti ndadenhe ni ondaxantte ixin ojoacha tti danjo vida.” ⁵⁵ Co ntiha ndačho cai: “Muerte, ¿cja tti joachaxin que jaha joarichonda para vagoenxin cuerpona na? ¿Cja tti jaha rrojacha?” ⁵⁶ Ixin tti jianha que nchehe ni, mé tti chjé joachaxin muerte para doen cuerpo ni. Co

ley que joanjo Dios ndačho que ixin jamé tsonhe.
57 Pero chjé na gracias ngain Dios ixin jehe chjá na joachaxin para sacha na de ngain muerte ixin Jesucristo ojoacha.

58 Mexinxin de cain jihi, cainxin tiempo dintte ra soji co nchehe ra icha co icha inchin coetonha Jesucristo ixin jaha ra onoha ra que tti xá que jaha ra tenchehe ra conixin Cristo jeha jamaoncoa.

16

Quexén joatsetaonhe chó na tomi

1 Janhi sinchehe ra para satsetaonhe chó ra tomi para tsjenguijananxin ra icha chojni que ditticaon Jesucristo, xajeho inchin tti ndattjan chojni ngain cainxin nihngo que te ngain nonttehe Galacia. **2** Cain domingo cada jaha ra dantsjenda ra nchion tomi que dacha ra ngain cada semana co ttenschinha ra tomi mé para que isatsetaoenha chó ra tomi are janha saso. **3** Co are janha saso, janha rrrorroanha para Jerusalén tti chojni que jaha ra rrondačho ra, co janha rrochjaha na ná carta para que sicao na tomi que jaha ra joatse ra para ngain chojni que ditticaon Jesús ntiha. **4** Co si janha nchao tsji, cai tsji conixin jehe na.

Are xaxaon Pablo quecá lugar satsji

5 Ngain viajena chonda que satto nongain nonttehe Macedonia, cottimeja saso ngain ciudad de Corinto. **6** Puede ntiha tasarihi nganji ra nchion sé o puede hasta ngoixin tiempoe quin. Cottimeja jaha ra nchao tsjenguijna ni ra para ngain viajena tti janha chonda que satsji después. **7** Janha rinahoa jeho sattotaonxon nganji ra; janha rinaho

sarihi ná tiempo nchion sé nganji ra si Dios rrochjana joachaxin. ⁸ Pero janha xá sarihi nttihi ngain ciudad de Efeso hasta ngain quiai de Pentecostés, ⁹ ixin janha chonda ná jian oportunidad ngain tiempo jihí para rrondattjan chojni co tsjagoa na de ixin Dios masqui te tsje chojni que jehe anto ningaconhe tti janha ndačhjan.

¹⁰ Si siji Timoteo nganji ra, nchehe ra que jehe sehe contento ngayaha ra ixin jehe nchehe xé Dios inchin janha. ¹¹ Mexinxin ni ná jaha ra nchedes-preciahra are jehe siji nganji ra. Ttjenguijna ra para ngain viajé jehe para que jehe tsí contento sitsjena ixin janha rrichoan jehe conixin icanxin xicompañerona na.

¹² Co Apolos janha anto jointtatsán ñao para que rroguiji rroguitsjaha ra conixin icanxin chojni que ditticaon Jesucristo, pero jehe čohoa joiji jai. Jehe siji pero are jehe rrochondaja oportunidad.

Pablo joexin cjin carté co rroanha joajna

¹³ Dintte ra listo, co ditticaon ra jeho Cristo. Dintte ra inchin xí jian. Dintte ra soji. ¹⁴ Cain cosa que sinchehe ra, nchehe ra jian ixin jamé rročho que ján rinao ra cain chojni.

¹⁵ Co jai, hermanos, jaha ra noha ra que ixin Estéfanas conixin cain nindoha, jehe na tti nisaho vitticaon tti jian joajné Cristo ngain regioen Acaya. Co jehe na nitettjenguijna icha chojni que tediticaon palabré Cristo. ¹⁶ Janha rinaho que jaha ra ditticaon ra tti chojni que nchehe inchin jehe Estéfanas conixin nindoha co inchin tti chojni que nchehe xé Dios co inchin tti chojni que ttjenguijna icha chojni que ditticaon palabré Cristo. ¹⁷ Janha

anto chahna ixin vicon joí Estéfanas, co Fortunato co Acaico. Jehe na nicjoenguijna na janha na ixin jaha ra čhoha cjoenguijna ni ra ixin vintteha ra nttihi. ¹⁸ Jehe na joincheanimá na na janha inchin joinchehe na nganji ra cai. Janha rinaho que cain chojni rronichja jian ngain chojni que ncchehe inchin jehe na.

¹⁹ Cain chojni ngain nihngo de ngain regioen Asia rroanha na joajna para ixin jaha ra. Co Aquila, co Priscila, co cain chojni que xatte ngain nchiandoha na para servicio cai rroanha na tsje joajna para ixin jaha ra. ²⁰ Cai cain chojni que diticaon Jesucristo nttihi ngain ciudad jihi rroanha na tsje joajna nganji jaha ra. Co cain jaha ra chjehe chó ra joajna jian are setan chó ra.

²¹ Janha, Pablo na, rrirroanha ra joajna jihi que cjixin na conixin rana co letrana.

²² Si čhonja chojni rinaoha na Jesucristo, chojni mé te na condenado. ¡Jesucristo, jaca sihi!

²³ Jesucristo sinchenchaon nganji ra. ²⁴ Janha rinaho de ngain ansenna cainxin jaha ra ixin cainxin na chojní Jesucristo na. Amén.

**Tti jian joajn   Jesucristo
New Testament in Popoloca, San Marcos Tlalcoyac  **

copyright © 1982 Wycliffe Bible Translators, Inc.

Language: San Marcos Tlalcoyac   Popoloca (Popoloca, San Marcos Tlalcoyac  )

Translation by: Wycliffe Bible Translators, Inc.

Popoloca, Tlacoayac   [pls], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Marcos Tlalcoyac  

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

lix

2018-11-16

PDF generated using Haiola and XeLaTeX on 11 Nov 2022 from source files
dated 29 Jan 2022

a23ba35e-b016-5f67-a705-694e460cf18a